

DIŽA' GÜEN DAN' BZOJ SAN MATEO

Ẑoxxtao' Jesucriston'
(Lc. 3:23-38)

¹ Nga nyoj la beṇe' gosac Ẑoxxtao' Jesucriston' chzolaon len da' Ẑoxxta'ocho Abraham. Le Jesúsēn' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' Ẑa Isaac, na' Isaaquen' goque' Ẑa Jacob, na' Jacoben' goque' Ẑa Judá len yezica'chle beṇe' biše' ca'. ³ Judán' na' Tamar gosaque' Ẑaxṇa' Fares na' Zara. Na' Faresen' goque' Ẑa Esrom, na' Esronṇa' goque' Ẑa Aram. ⁴ Na' Aranna' goque' Ẑa Aminadab, na' Aminadaben' goque' Ẑa Naasón, na' Naasónṇa' goque' Ẑa Salmón. ⁵ Salmónṇa' na' Rahab gosaque' Ẑaxṇa' Booz. Na' Boozen' na' Rut gosaque' Ẑaxṇa' Obed. Na' Obeden' goque' Ẑa Isai. ⁶ Na' Isain' goque' Ẑa rey David, na' rey Davin' goque' Ẑa Salomón. Na' xṇa' Salomónṇa' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónṇa' goque' Ẑa Roboam, na' Roboanna' goque' Ẑa Abías, na' Abíasen' goque' Ẑa Asa. ⁸ Na' Asan' goque' Ẑa Josafat, na' Josafaten' goque' Ẑa Joram, na' Joranna' goque' Ẑa Uzías. ⁹ Uzíasen' goque' Ẑa Jotam, na' Jotanna' goque' Ẑa Acaz, na' Acazen' goque' Ẑa Ezequías. ¹⁰ Na' Ezequíasen' goque' Ẑa Manasés, na' Manasésen' goque' Ẑa Amón, na' Amónṇa' goque' Ẑa Josías.

¹¹ Josíasen' goque' ɣa Jeconías len yezica'chle biše' ca' gosenita' ca tiemp caten' bene' Babilonia ca' gosezene' bene' Israel ca' na' goseche'xoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' ɣa Zorobabel. ¹³ Na' Zorobabelen' goque' ɣa Abiud, na' Abiuden' goque' ɣa Eliaquim. Na' Eliaquinna' goque' ɣa Azor. ¹⁴ Na' Azoren' goque' ɣa Sadoc, na' Sadoquen' goque' ɣa Aquim. Aquinna' goque' ɣa Eliud. ¹⁵ Na' Eliuden' goque' ɣa Eleazar, na' Eleazaren' goque' ɣa Matán. Na' Matánna' goque' ɣa Jacob. ¹⁶ Nach Jacoben' goque' ɣa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca tiemp che da' David bžinte ca tiemp caten' gosezene' bene' Israel ca' goseche'xoxje' legaque' Babilonia, lecze gosac yežta' diaža chen', na' ca tiempen' bžinten ca žan' golje Criston' ben' gwlej Diosen' cont yedenabi'e, gosac yežta' diaža chen'.

Can' goc cate' golje Jesucriston'

(Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bchendao' bdao'na' lo' le'e. ¹⁹ Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marían' šižize cont nono gacbe'e na'

cont bi gwsı'e le' zto'. ²⁰ Šlac chone' xbab gone' ca' gwtase' na' to angl bene' gwsela' Xancho Diosen' blo'elagüe' le' lo bišgal. Na' gože' le':

—José, le' goljo' lo diaža che da' rey David. Bitw žebo' si'o Marían' par gague' xo'olo'. Spiritw che Diosen' benen cont no'e bdao'na'. ²¹ Na' sane' to bi' byo dao' na' gwsı'o labe' Jesús, le len' yeque'e xtola' bene' gualaž che' ca' bene' yesejnılaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' canı', gwne':

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwnede' yelen', bene' can' gož angl che Xancho Diosen' le', jaxı'e Marían' liže' par goque' xo'ole'. ²⁵ Perw bi gwzoalene' le' ca xo'ole' san gwzoacze' le' respetw bžinte ža gwxane' to bi' byo dao', xi'ıne' nechw. Na' gwxi' labe' Jesús.

2

Magos ca' jasene'e Jesúsen'

¹ Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. ² Na' gosenabde' bene' lo ciudan' gose'ene':

—¿Gan rey che bene' Israel, ben' ba golje? Nezeto' ba golje', le ba ble'eto' beljw chen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwneze rey Herodesen' can' gosenen', gocchgüe' tole, na' lecze ca' yogo'lol bene' lo ciuda

Jerusalénna'. ⁴ Nach reyna' btobe' yogo'loł bꞑoz gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwnabde' legaque' gan' naquen galje Criston' ben' gwlej Diosen' cont yedenabi'e. ⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia', na' le' güia ne'e nación Israel chian'.

⁷ Nach Herodesen' goxe' magos ca' багаše'ze cont ja'aque' lagüen' na' gwnabde' legaque' batyanen' besele'ede' bla' beljon'. ⁸ Nach gwsele' legaque' Belénna', gože' legaque':

—Le šja'ac na' le šjaydiljw bidao'na' tcho'a. Na' cate' yeželelebe' le yeda yedyedixjue'ele neda' cont lecze ša'a šjenxena'be'.

⁹ Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' bina' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen.

¹⁰ Na' magos ca' besyebede' juisyw cate' besele'ede' beljon' da' yoble. ¹¹ Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marían'. Nach bosozoa xibgaque' gosonxene'be'. Na' gosesaljo caj chegaquen' gosebeje' oro, yal na' to nechw da' chla' zix da' nzi' mirra na' gosoen' chebe'.

12 Na' šlac ne' nita' magos ca' Belénna', Diosen' gwdixjue'ede' legaue' lo bišgal bich yesyedie' gan' zoa rey Herodesen'. Da'nan' besyeque'e yeto nez yoble jaya'ac laže'.

Bosoxonje' ja'aque' Egipto

13 Na' cate' ba besyeya'ac magos ca', to angl che Xancho Diosen' blo'elagüe' Josén' lo bišgal, na' gože'ne':

—Gwyas, gwche' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidaon'na' cont gote'be'.

14 Nach ne' ze bxin gwyas Josén', gwche'e bida'ona' len xna'ben' zja'aque' Egipton'. 15 Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': “Chixjue'eda' Xi'inan' yeze'e Egipton'.”

Herodesen' gwsele' soldadw cont gosote' yogo' bi' byo dao'

16 Na' rey Herodesen', cate' gocbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaue' batcan' bla' beljon', na' gwsele' soldadw che' ca' par jasete' yogo'lol bi' byo che'en dao' zelao bi' chop ize, bi' ca' gosalle Belénna' na' yezica'chle yež ca' zjanyechj zjambi'i Belénna'. 17 Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

18 Nente ši'i bene' Ramá, chesebežchgüe' nita'chgüe' yela' güine'.

No'ole ca' zjanaque' xi'in diaža che da'
Raquel chesyeyaše' chesyegüine'de' che
xi'inda'ogaque' ca',
na' bitw chesaclaže' no yeyoexenlaže' legaque', le
ba gosatben'.

¹⁹ Cate' got Herodesen', Josén' ne' zoe' Egipton'.
Nach to angl che Xancho Diosen' blo'elagüe' Josén'
lo bišgal, na' gože'ne':

²⁰ —Gwyas, beche' bidaon' len xna'be'na' na'
le šjaya'ac Israel. Ba gosat beñe' ca' besyeyiljw
bidao'na' cont yesote'be'.

²¹ Nach gwyas Josén' beche'e bidaon' len
xna'ben' jaya'ac lažgaque' Israel. ²² Perw Josén',
cate' bende' Arquelao bezoe' chnabi'e latje che
da' xe' Herodesen', bžebe' yeyeje' gan' mbane
distritw Judean'. Na' Diosen' gwdixjue'ede' le' lo
bišgalen' bi cheyala' šjaya'aque' distritw Judean',
san šjaya'aque' gan' mbane distritw Galilean'.
²³ Da'nan' besyežine' ciuda Nazaret na' jassenite'.
Na' dan' jassenite' Nazareten' goc can' bosozoj da'
beñe' goso'e xtiža' Diosen' can', gosene': “Yososi'e
Jesúsen' beñe' Nazaret.”

3

*Juan ben' bzoa beñe' nis gwdixjue'ede' diža' güen
che Diosen'*

(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa beñe' nis
gwyeje' latje daš gan' mbane distritw Judean'.

² Na' gwdixjue'ede' beñe', gože' legaque':

—Le yetinje xtol̥a'le ca', le ba bžin ža cate' Diosen' ben' zoa yaban' nabi'e yichjlaždao' beñe' yosozenague' che'.

³ Che Juanna' bzoj da' Isaíasen' caten' bzoje' Xtiža' Diosen' cani', gwe'ne':

Bena' chne' zižje latje dašen', že':

“Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'.”

⁴ Na' Juanna', xalane' goquen de yiša' xa camello. Na' da' bchej lsinen' goquen de yid, na' gwdagüe' biše'zo len šina' beser yiše'. ⁵ Beñe' že' ciuda Jerusalénna' na' beñe' že' yogo' yež ca' gan' mbane distritw Judean', na' lecze beñe' že' yež ca' nyečhj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. ⁶ Na' cate' gosexoadole' bi da' xinj zjanone', Juanna' bzoe' legaque' nis lo yegw Jordánna'.

⁷ Na' lecze ja'ac zan beñe' Israel beñe' ca' zjanzi' fariseo na' beñe' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—iLe'e nacchgualē beñe' zgot na' beñe' gwxiye'! ¿Chaquēle guac yelale lao castigw dan' sel̥a' Diosen' caten' gone' yel̥a' justis che beñachen'? ⁸ Še da' li ba betinjele xtol̥a'len', cheyal̥a' gonle da' nac güen cont yesache'e beñe' ba boša' yichjlažda'olen'. ⁹ Na' bitw gonle xbab gaquēle Diosen' bitw gone' le'e castigw che xtol̥a'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in

diaža che da' Abrahanna'. ¹⁰ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. ¹¹ Neda' da' li chzoa' le'e nis neche ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' nabian' le'e. Na' bene' ca' bi yeson can' chazlaže' Diosen', sele' leaque' lo' yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. ¹² Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sele' leaque' lo' yi' gabilen' dan' cbi cheyol chenit.

Cate' gwzoa Jesúsen' nis

(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' le' nis. ¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lol dan' non Diosen' mandadw gac.

Nach gwcheb Juanna' bzoe'ne' nis. ¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen

gwzoan len le'. ¹⁷ Na' gosende' gwne Dios ben' zoa yaban', gwne':

—Bengan' Xi'ina' bene' chacda' na' chebe cheza-quelaže' chgüeda' che'.

4

Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

¹ Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao choa ža choa yel, na' cate' gwde da' choa žana' gwdone'. ³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojcze Xtiža' Diosen' žan: “Gague yela' guagw na'zen' chyažje chio' benač cont gac bancho, san lecze chyažjecho yogo'lol diža' dan' ža Diosen'.”

⁵ Nach gwche' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe, ⁶ na' gožen le':

—Še len' naco' dogualje Xi'in Diosen', nga boslažo' cuino', le' nyojcen le'e Xtiža' Diosen', žan:

Sela' Diosen' bene' ca' zjanac angl che' yesaclene' le',

na' yesoxe' le' cont bi chego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen. ⁹ Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczen le'e Xtiža' Diosen' žan: “Cheyalā' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to čhope angl čhe Diosen' jasac-lene' le'.

Jesúsen' gwzomagüe' chyixjue'ede' diža' güen čhe Diosen' distritw Galilea

(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya.

¹³ Na' gwze'e yež Nazareten' jasoe' ciuda Capernaum dan' čhi' cho'a nisdaon' do gan' zjachi' distritw dan' zjanzi' Zabulón na' Neftalí. ¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan beņe' cbi zjanaque' beņe' Israel,

gan' nita' distritw Zabulón na' distritw Neftalí dan' zjambane yešlā'ale nisdaon' na' yegw Jordán,

¹⁶ nčhol yichjlaždao' beņe' ca' že' na'.

Perw Diosen' gwsele' to bene' gwlo'o to be'ni' xen
lo' yichjlažda'ogaquen'.

Gosaque' ca bene' guat len yichjlažda'ogüen' le
gosone' da' malen',

perw bena' gwsela' Diosen' ba bocobe'
yichjlažda'ogaquen'.

¹⁷ Cana' gwzolao Jesúsen' gwdixjue'ede' gwne':

—Le yetinje xtolalen', le ba bžin ža cate'
Diosen' ben' zoa yaban' nabi'e yichjlaždao' bene'
yosozenague' che'.

*Jesúsen' gwleje' tap bene' gwxen bel cont gosaque'
txen len le'*

(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' che Galilea cate'
ble'ede' chope bene' gwxen bel, Simón Pedro na'
bene' biše' Andrés, na' zjanite' chosozale' yixjw
dan' chesezende' belen' lo' nisa'. ¹⁹ Nach gože'
legaue':

—Le šo'o len neda'. Nacle bene' gwxen bel, na'
chbejle bel lo' nis, perw na'a gona' cont gaxle bene'
yesyechoje' lo da' malen'.

²⁰ Na' la' gosebejyichjte' yixjw chen' nach
ja'aclene' Jesúsen'.

²¹ Na' Jesúsen' gwze'e yelate' na' ble'ede' Ja-
cobon' xi'in Zebedeo na' len bene' biše' Juan,
zjajo'e to lo' barcw len xagaque', chesyejonšagüe'
yixjw chegaquen'. Na' lecze gox Jesúsen' legaue'
šja'aclene' le'. ²² Na' la' gosontie' barcon' lo na'
xagaque' Zebedeon' na' ja'aclene' Jesúsen'.

Jesúsen' bsd blo'ede' bene' zan
(Lc. 6:17-19)

23 Na' Jesúsen' gwyeje' yogo' yež ca' zjachi' gan' mbane Galilea, bsd blo'ede' beṇe' ca' zjaže' to to yodao' che chio' beṇe' Israel. Na' gwdixjue'ede' diža' güen can' nabia' Diosen' yichjlaždao' beṇe' yosozenag che'. Na' Jesúsen' beyone' beṇe' ca' chese'e bite'teze yižgüe'. 24 Na' doxen nación Siria gwxa diža' yogo' da' güen da' ben Jesúsen'. Nach beṇe' Siria ca' jasesane' yogo' beṇe' chesacšene lagüe'na', beṇe' chese'e zan yižgüe', beṇe' chesey chesela, beṇe' zjayo'o zjanyaz da' xigüe' yichjlažda'ogaque' len beṇe' chesaz šon na' beṇe' natsi' cuerp chegaquen'. Na' beyone' legaque'. 25 Na' zan beṇe' gosao' le', beṇe' za'ac distritw Galilea na' distritw Decápolis, na' beṇe' za'ac ciuda Jerusalén, na' beṇe' za'ac yezica'chle yež da' zjachi' distritw Judea, na' beṇe' za'ac yešla'a yegw Jordán.

5

Diža' dan' bsd blo'e Jesúsen' to lo ya'a (Lc. 6:20-23)

1 Na' Jesúsen' cate' ble'ede' beṇe' zan zjanžag, na' gwloe' gwchi'e to lo ya'a. Na' beṇe' ca' zjanaque' le' txen gosebigue' gan' chi'ena'. 2 Nach gwzolao bsd blo'ede' legaque', gwne':

3 —Mbalaz zoa le'e chache'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

4 'Mbalaz soa le'e chacyaše'laže'le, le Diosen' yeyoe'xenlaže' le'e.

⁵ 'Mbalaz zoa le'e chzexjwlaže'le len Diosen' na' len beṇachen', le gon Diosen' cont gac lo na'le doxen yežlion' can' gwne'.

⁶ 'Mbalaz zoa le'e chzelaže'chgualē gacle beṇe' güen len Diosen', le ba cheyon Diosen' le'e beṇe' güen lagüen'.

⁷ 'Mbalaz zoa le'e cheyaše'le beṇe' yoble, le lecze ca' Diosen' yeyaše' yeži'ilaže'de' le'e.

⁸ 'Mbalaz zoa le'e ba nacle beṇe' laždao' xilaže', le šjayzoale txen len Diosen'.

⁹ 'Mbalaz zoa le'e chego'ole yela' chxenlaže' che beṇe' chesedile, le Diosen' ne' nacle xi'ine'.

¹⁰ 'Mbalaz zoa le'e chosoči chososaca' beṇe' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

¹¹ 'Na' mbalaz soale še dan' chejnilaže'le neda' chesezi'diža' beṇe' le'e na' chososaca'zi'e le'e na' chosoxie' diža' güenlaže' chele. ¹² Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxta'ocho len da' beṇe' ca' goso'e xtiža' Diosen' cani'.

Naccho ca zede' na' ca be'ni' len beṇe' že' yežlio nga

(Mr. 9:50; Lc. 14:34-35)

¹³ 'Le'e nacle ca zede', le zede' chaclenen cont bi cuiayi' no yid bela', na' le'e chonle cont beṇachen' cbi chesontequē da' mal. Perw še zeden' bich bi zxi' naquen, ḡnacxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj beṇe' len. Na' le'e še cbich gonle can'

chazlaže' Diosen', nacle ca zede' dan' bich bi zxi' naquen.

¹⁴ 'Na' le'e nacle ca be'ni' dan' chaclenle be'ne' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze be'ne' chesele'eden'. ¹⁵ Notno gwguala' to yi' na' gwdosen' to caj, san chde'en le'e ze'e cont chsenin' len yogo' be'ne' že' lo' yo'ona'. ¹⁶ Na' ca nac le'e, cheyala' soateze soale gonle da' güenna' cont yesele'e be'ne' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

¹⁷ 'Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle be'ne' ca' goso'e xtiža' Diosen' cani' bich yesonen žin. Za'a cont gac can' ža yogo'lol Xtiža' Diosen' dan' bosozoj be'ne' ca'. ¹⁸ Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e ley na' bi gac yexin, san gac yogo'lol dan' nžia bia' Diosen' gac. ¹⁹ Da'nan' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele be'ne' yoble bi yosozenague' chen, Dios ben' zoa yaba chnabi'e ne' bi nacle be'ne' blao len le'. Na' note'tezle še gonle can' žanna', na' še lecze gwlo'ele be'ne' yoble yesone' ca', Diosen' ben' zoa yaba chnabi'e ne' nacle be'ne' blao len le'. ²⁰ Chnia' le'e, be'ne' fariseo ca' na' be'ne' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clel ca

che bene' ca', bitw yežinle yaban' gan' zoa Diosen' chnabi'e.

Da' malen' choncho še chža'a lježcho
(Lc. 12:57-59)

²¹ Na' lecze bsed blo'e Jesúsen' legaue' gože'ne':

—Ba nezele can' bzejni'i Moisésen' bene' ca' gosenita' cani', gwne': “Nono gotle. Na' še no got ljež benache', justis ca' yesechoglagüe' che' cheyala' gate'.” ²² Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

²³ 'Cheyala' soacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, ²⁴ na'ze cheyala' gwcua'anle šlož dan' noxe'len' na' šjenle cont yezoale binlo len bene' lježlen'. Yeyoža' guaue šjasanle dan' ba gwlejle cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yososeyjue' le'e ližya.

²⁶ Da' li žia' le'e, bitw yebeje' le'e še biṇa' chixjwle doxen dan' čala'le.

Da' malen' choncho še chzoa xtocho

27 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele." 28 Na' neda' žia' le'e, note'tezle še chna'le to no'ole na' chzelaže'lene', ba naple doła'. Le tozecze ca malen' ba chonle lo' lažda'olen' len dan' chon bene' chzoa xtoe'.

29 'Na' še yejlaolen' chonen cont gonle da' xinj, cheyala' cuejyichjle da' malen' chonle. Yejni'a cuiayi' yejlaolen' clal ca cuiayi'le lo yi' gabilen' neche len. 30 Na' še na'le chonen cont gonle da' xinj, cheyala' cuejyichjle da' malen' chonle. Yejni'a cuiayi' na'le clal ca cuiayi'le lo yi' gabil neche len.

Bene' ca' zjanšagna' bitw cheyala' yesyele'e

(Mt. 19:9; Mr. 10:11-12; Lc. 16:18)

31 'Lecze nezele ley dan' bzoj da' Moisésen' žan: "Note'teze bene' ye'e len no'ol che', cheyala' chas to yiš ga güen' diža' le besyele'ena'." 32 Na' neda' žia' le'e note'teze bene' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gaque' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

Jesúsen' bzejni'ide' cheyala' güe'cho diža' li

33 'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyala' gonle con can' ba gwnalen'."

34 Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e.

35 Na' neca nale: "Yežlion' zoan testigw chia' cho'a

diža' lǐ", le yežlion' den xni'a Dios. Neca n̄ale: "Ciuda Jerusalénna' zoan testigw chia' cho'a diža' lǐ", le naquen ciuda che Dios ben' naque' la'zelagüe bene' chnabia'. ³⁶ Na' n̄eca n̄ale: "Yichja' zoan testigw chia' cho'a diža' lǐ", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. ³⁷ Še žale guaquen, gacczen; še žale bi gac, bi gacczen. Le bichle diža' da' n̄ale cont yesejle'e chele, zan' che Satanás dan' chnabia' da' xigüe' ca'.

Bitw co'olaže'cho bene' chesegue'ede' chio'
(Lc. 6:29-30)

³⁸ 'Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'."
³⁹ Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. ⁴⁰ Še to bene' chagüe' xya na' che'nde' que'e xcamisle, le güe' latje que'e len xadon chelen'.
⁴¹ Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le. ⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

Cheyalā' gaquecho bene' chgue'e chio'
(Lc. 6:27-28, 32-36)

⁴³ 'Na' lecze ba nezele ley chelen' žan: "Cheyalā' gaquele bene' migw chele na' gue'ele bene' chgue'ede' le'e." ⁴⁴ Perw neda' žia' le'e, cheyalā' gaquele bene' chgue'ede' le'e, na' cheyalā' nabele Diosen' gac güen che bene' chesezi'diže' le'e. Le gon binlo len bene' chesegue'ede' le'e, na' le yol güiž Diosen' cont gac güen che bene' ca' chososacazi'e

le'e. ⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. ⁴⁶ Še chaquele šinze bene' chacde' le'e na' bi chaquele bene' yoble ¿bixchen' chbezle gon Diosen' da' güen chele? Con can' cheson bene' güechixjw ca' chonle, bene' ca' žale zjanaque' bene' xi'achgua. ⁴⁷ Na' še con chguaple tiox bene' biše' lježle ca'ze ¿chaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'. ⁴⁸ Cheyala' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyala' goncho da' chazlaže' Diosen'

¹ 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. ² Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen čegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čegaque' še ca'. ³ San le'e, še bi da' gwnežjwle to bene', le gwnežjon šižize. ⁴ Gonlen ga cbi yesache'e bene' na' cbi yesonxene' le'e, nach Xacho Diosen'

ben' chle'ede' yogo' dan' choncho gone' ga gac
güen chele ga yesele'e yogo' bene'.

*Bsed blo'e Jesúsen' nac cheyala' yol güižcho Dios
(Lc. 11:2-4)*

⁵ 'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosacx-enczen' lagüe da' chesone' ca', perw Diosen' bitw gone' ga gac güen chegaque' še ca'. ⁶ Na' cate' yol güižle Diosen', le yeyo'o lo' yo'o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

⁷ 'Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. ⁸ Bitw gonle can' chesone'na'. Ca nac Xacho Diosen', cate' za' nabelenen' ba nezcze' bi dan' chyažjele. ⁹ Quinga yol güižlene':

Xato' bene' zoa yaba, chnabto' yogo'lol bene' yesonxene' le'.

¹⁰ Zelaže'to' nabi'o yichjlaždao' yogo' neto' benach. Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, benšcan na'a.

¹² Na' bezi'xenšca cheto', le lencze neto' chezi'xento' che ljež benachto' bite'teze da' chesonde' neto'.

13 Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli tocanē.

Ca'czen' gacšca.

14 Na' še chezi'xenle che ljež benachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. 15 Perw na' še le'e bi chezi'xenle che ljež benachle, lecze ca' Xacho Diosen' bitw yezi'xene' chelen'.

Jesúsen' bzejni'ide' nac goncho gwbas

16 'Cate' le'e gonle gwbas cont gonxenle Diosen', bitw gon cho'alaolen' ca che bene' chegüine'chgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. 17 San le'e cate' gonle gwbas, le gwpa'a yichjle na' le chib cho'alaole. 18 Le gon ca' cont bi yesache'e bene' chonle gwbas, san gache'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

19 'Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Bal da' zjade yežlio nga chesaljen be dao' chesagwban', na' yebalen chesezen xche'en, na' lecze chaš bene' gwban na' yeseque'en. 20 San le gaque Diosen' cont gone' da' šagüe' da' güen chele da' bi te chen

cate' yežinle yaban' gan' zoe'na', da' bi šo'ba', na' nēca sen xche'en, na' nēca gac šo' bene' gwban yeseque'en. ²¹ Le gan' de dan' chaquelen' na' zoa yichjlažda'olen'.

Žia yejlaocho cont chle'echo
(Lc. 11:34-36)

²² 'Žia yejlaole cont chle'ele. Še bitw bi chaquen, chle'eczele binlo. ²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchoł yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw
(Lc. 16:13)

²⁴ 'Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonon' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwni'a.

Diosen' chapši'e xi'ine' ca'
(Lc. 12:22-31)

²⁵ 'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xalana'le. Zaca'ch yela' mban chelen' ca' yela' guagw. Lecze ca' cuerp chelen', zaca'chen ca xalana'le. ²⁶ Le gon xbab ca nac be ca' zjažia xil ben' chesaš lo be', bitw chesazba', bitw cheselapba', nēca zoa da'a xoa' chegacba', perw na' Xacho Diosen' ben' zoa yaba chguagwcze'ba'. ¡Nacchle

zaca' le'e ca be ca' zjažia xilen'! ²⁷ Na' ne tole bi gac yoston cuinle gašje metr še con cue' yichjle tonle.

²⁸ 'Na' ħbixchen' chbec yichjle xalana'le? Le gon xbab ca nac yej ca' da' zjaze yixe' chesecha'oczen'. Bibi žin chesonen, neca chesaljen do. ²⁹ Na' žia' le'e, da' rey Salomón gocue' lache' güen juisyw, perw bitw bežinlaže' xalane'na' ca yela' xdan che yej ca'.

³⁰ Diosen' none' xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'. ³¹ Da'nan' bitw cuec yichjle che bi dan' chyažjele, nale': "ĤBin' ye'ej gagwcho na' bin' gacwcho?" ³² Bene' ca' bi chesonxene' Diosen' con chesoe'laže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nezczede' bi da' ca' chyažjele. ³³ Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. ³⁴ Bitw cuec yichjle che bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho che dan' chac ca hora'.

7

Bitw zaca'cho nacho zjanap bene' dola'

(Lc. 6:37-38, 41-42)

¹ Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. ² Can' chosbaga'le bene' žale zjanape' dola', lecze can' yosbaga' Diosen' le'e ne' naple dola'. Con can' chonle len bene', lecze

can' gon Diosen' len le'e. ³ ¿Bixchen' cẖna'le beb dao' dan' yo'o lo' yejlaobenē' lježle na' bi chache'ele naquech beb xen dan' yo'o lo' yejlaolen'? ⁴ Na' še le'e yo'o to da' xench lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon"? ⁵ ¡Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaobenē' lježle.

⁶ 'Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca cheson bal beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošoše' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le gonczen'
(Lc. 11:9-13; 6:31)

⁷ 'Še žan bi da' chyažecho, cẖabchon. Še žan to da' chaclaže'cho želecho, chyiljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'. ⁸ Na' note'tezle še bi da' cẖabelene', gonczen'. Na' še bi dan' che'nele nezele, gwzejni'iczen' le'e. Na' še žan chaclaže'le gac to da' gac, yol güižle Diosen' can' chon to bene' cẖnie' cho'a puert, nach Diosen' gone' cont gacczen.

⁹ 'Na' le'e xa bidao', še xi'inle nabebe' le'e yetextil ¿gwnežjwlebe' to yej? ¹⁰ Na' še nabbe' yid bel gagwbe', ¿gwnežjwlebe' to be xigüe'? ¹¹ La' nacle bene' mal, nezele chnežjo xi'inle to da' güen. Nacchxe

güen gon Xacho Diosen' ben' zoa yaban' len bene' chñab lagüe'na' bi dan' chyažjde'.

¹² 'Na' con yogo' da' güen da' chaclaže'le yeson benachen' len le'e, lecze ca' cheyala' gonle len legaque', le can' zejen da' nyoj le'e ley dan' bzoj da' Moisésen' na' dan' bosozoj da' bene' ca' goso'e xtiža' Diosen' cani'.

Nez da'yežin yaban' zaca'leben ca to nez las

(Lc. 13:24)

¹³⁻¹⁴ 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyala' gonle byen šo'le nez güenna' la'czla' chaquele naquen ca to nez las, to nez zdebe, le nez malen' chežinen gabil gan' saca'zi'le toli tocanē. Na' nez güenna' chežinen yaba ga banle toli tocanē.

Dan' choncho chlo'en bin' yo'o lo'yichjlažda'ochō

(Lc. 6:43-44)

¹⁵ 'Cheyala' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclačže' gonle xbab zjanaque' bene' güen. Perw zjanaque' bene' laždao' xi'a na' chesaclačže' yosožiaje'e le'e. ¹⁶ Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyala' gacbe'ele bene' ca' yeseziye'e le'e cate' le'ele dan' chesone'na'. ¹⁷ Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian. ¹⁸ Bitw nacho to yag frut güen chbian frut da' bi nac güen, na' neca

nacho dan' bi nac güen chbian da' nac güen. ¹⁹ Na' yogo'te yag frut da' bibi chbia, chog xan yaga' len na' gwzeyen'. ²⁰ Na' can' nac dan' cheson to to beñe', nezecho še zjanaque' beñe' güen o beñe' mal.

Gague yogo' beñe' yesyežine' gan' zoa Diosen' chnabi'e

(Lc. 13:25-27)

²¹ 'Beñe' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Beñe' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'. ²² Cate' žin ža yosodie' cuent lao Diosen', beñe' zan yesi'e neda': "Xana', goclen neto' na'a, le ba gwdixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjayo'o zjanyaz yichjlaždao' beñe'. Na' lecze bza' bzetjto' lao'na' bento' da' zan yela' guac." ²³ Perw na' yapa' legaue': "Bitw nombi'a le'e. Le šjaya'ac ca'ale le'e beñe' güen da' xinj."

Chope beñe' na' yo'o da' chon to toe'

(Mr. 1:22; Lc. 6:47-49)

²⁴ 'Beñe' chzenag xtiža'na' na' chone' can' žia'na' zaca'lebde' ca to beñe' sina' beñe' ben liže' na' gwdixjue' lenen len yej gual. ²⁵ Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej. ²⁶ Na' beñe' chzenag xtiža'na' perw bitw chone' can' žia'na', zaca'lebde' ca to beñe' tont beñe' bzoa ližen' lo yox. ²⁷ Na' goc yejw zil juisyw na' na' betj yegon' gwyechjen liže'na' na' gwyechj be' bdono'. Nach ližen' bebixen gwžiajin'.

²⁸ Na' cate' beyož be' Jesúsen' diža' ca', be_{ne}' ca' že' na' besyebande' can' bsd blo'eden'. ²⁹ Le can' bzejni'ide' nacbia' ne_{zde}' cayanen' nac xbab che Diosen', gague bzejni'ide' can' chosozejni'i be_{ne}' ca' chososed chosolo'e ley dan' bzoj da' Moisésen'.

8

Jesúsen' beyone' to be_{ne}' che'ede' yižgüe' dan' nzi' lepra

(Mr. 1:40-45; Lc. 5:12-16)

¹ Be_{ne}' zan zesyenagüe' Jesúsen' cate' beyetje' ya'ana'. ² Nach to be_{ne}' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsen' bli ne'e na' gwxo_{en}' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'.

⁴ Nach Jesúsen' gože' le':

—Notno yo'o can' ba beyona' le'. Con gwyej ja_{na}' bxoza' cont le'ede' ba_{ch} beyacdo'. Na' bnežjw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' be_{ne}' yesene_{zde}' ba beyacdo'.

Jesúsen' beyone' xmos to soldadw

(Lc. 7:1-10)

⁵ Na' cate' bežin Jesúsen' Capernaum to xan soldadw be_{ne}' Roma la' bšagte' le'. Na' gota'yoede' Jesúsen', ⁶ gože'ne':

—Xana', xmosan' die' ližan' chacšenchgüede'.
Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' bene' zaque' par sa'o liža'na'.
Ngateze ben mandadw yeyac xmosan' na' yey-
accze'. ⁹ Neda' zoa bene' chnabi'e neda', perw
lecze nita' soldadw chia' na' chnabia'gaca'ne'. Cate'
chapa' toe': "Gwyej", na' cheje', na' cate' chapa'
yetoe': "Da", na' chide', na' cate' chapa' xmosa':
"Da' nga gono", na' chonen'. Nan' nezda' con nao'
yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa'
bebande' na' gože' bene' ca' zjanagüe' le'na':

—Da' licze žia' le'e, ne toze bene' Israel bina'
šejnilaže'chgüe' neda' ca benga bi naque' bene' Is-
rael. ¹¹ Žia' le'e, bene' zan za'ac doxen yežlion'
šjasyenite' txen len da' xozxta'ocho Abraham, Isaac
na' Jacob yaban' gan' zoa Diosen' chnabi'e na'
yesebi'e cho'a mes yesagüe'. ¹² Na' ca nac
bene' nación Israelen' ben' gwlej Diosen' cont
yesenite' len le', choj bene' zan bitw yesejnlaže'
neda'. Da'nan' sele' legaue' lo' yi' gabil gan' nac
chol na' yesebežyaše' na' yesagwxetje laye' dan'
yesežaglaochgüe'.

¹³ Beyož gwna Jesúsen' ca' nach gože' xan sol-
dadoa':

—Guac yeyejo'. Yeyaque xmoso'na', con can'
chejli'o gac che'.

Na' xmos xan soldadoa' la' beyactede'.

*Jesúsen' beyone' taobi'in che Pedroa'**(Mr. 1:29-31; Lc. 4:38-39)*

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la. ¹⁵ Jesúsen' beḡue' ne'e na' la' bechojtie' da' lan'. Nach la' gwyaste no'olen' bsiṇi'e da' gose'ej gosagüe'.

*Jesúsen' beyone' bene' zan**(Mr. 1:32-34; Lc. 4:40-41)*

¹⁶ Na' cate' ba gwḡin, besežin bene' gan' zoa Jesúsen' zjanči'e bene' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene. ¹⁷ Bene' ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglao checho na' yeque'e yogo' yižgüe' chechon'."

*Can' gož Jesúsen' bene' ca' gosacławe' yesa'ogüe' le'**(Lc. 9:57-62)*

¹⁸ Gwde na' ble'e Jesúsen' ba besežin bene' zan zjanyechjde' le', nach bene' mandadw len bene' ca' zjanaque' le' txen cont yeselague' yešla'a nesdaon'.

¹⁹ Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' benach.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Benšca latje zgua'tec šjaycuaša'ne'.

²² Jesúsen' gože'ne':

—Yo'o len neda'. Bene' ca' zjanac yichjlažda'ogüe' ca che bene' guat, legaque' guaccze yosocuaše' yezica'chle bene' guat.

Jesúsen' bcueze' to be' bdono' lo nisdao'

(Mr. 4:35-41; Lc. 8:22-25)

²³ Beyož be' Jesúsen' diža' ca', gwyo'e lo' barcon' len bene' ca' zjanaque' le' txen. ²⁴ Na' šlac zej barcon' lo nisen' gwzolao gwyechj to be' bdono' na' nisdao' leze chas chatan' na' gwzolao cheyož nis lo' barcon', perw ba chtas Jesúsen'. ²⁵ Nach bositysbane' le' gosi'ene':

—¡Xanto'! ¡Bosla chio'! ¡Bach chbiayi'cho!

²⁶ Nach Jesúsen' gože' legaque':

—¿Bixchen' chžebtecle ca'? ¿Nacxechen' bi chejle'le chia'?

Na' gwyase' na' gwdile' be' bdonon' len nisdao', na' la' gosebe'žiten. ²⁷ Na' bene' ca' zjanaque' Jesúsen' txen besyebande' can' bene'na', nach gose' lježgaque':

—¿Noxe benga? lente be' bdono' na' len nisdao' chosozenaguen che da' že'.

Chope bene' Gadara zjajo'o zjanyaze' da' xigüe'

(Mr. 5:1-20; Lc. 8:26-39)

²⁸ Na' besežine' yešla'a nisdao' gan' chi' laž bene' Gadara ca'. Na' cate' bechoj Jesúsen' lo' barcoa' bosošag chope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len

be_{ne}' chesyežague' na' gague no chac ta tnez. ²⁹ Na' bososye'e gose'e Jesúsen':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' bina' žin ža si'to' castigw?

³⁰ Na' ga_{la}'ze chesaš zan coš chesagwba'. ³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' be_{ne}' quinga, gwsela' neto' gan' nita' coš ca' na' be_n latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' be_{ne}' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jaselažo'ba' lo' nisaon' ga gosatba' gose'ejba' nis.

³³ Na' be_{ne}' ca' chosoyoe' cošen' besele'ede' dan' ba goquen na' bosyoxonje' jasyeyeže' be_{ne}' lagüe' yež yogo' can' ba goquen' na' can' ba besyeyac be_{ne}' ca' goso'o gosaz da' xigüen' yichjlažda'ogaquen'. ³⁴ Nach yogo' be_{ne}' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

9

Jesúsen' beyone' to be_{ne}' bi chda šla'a ni'a ne'e
(Mr. 2:1-12; Lc. 5:17-26)

¹ Nach Jesúsen' beyo'e lo' barcon' len be_{ne}' ca' zjanaque' le' txen besyelaque' yešla'a nisaon' par besyežine' Capernaum gan' ba gwzoacze' sša. ² Na' besežin xonj be_{ne}' zjanlene' to be_{ne}' xinj be_{ne}' bi chda šla'a ni'a ne'e, zjanxoe' le' to lo cam dao'. Cate'

gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

³ Na' bal bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca Dios." ⁴ Jesúsen' gocbe'ede' ca nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'?

⁵ Še yapa'ne': "Ba bezi'xena' xtolona'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nachbia' še napa' yela' guac gac can' gwnian'. ⁶ Perw neda' naca' bene' gwsela' Dios golja' benach gwlo'eda' le'e na'a zoa' yežlio nga napa' yela' gwnabia' cont yezi'xena' xtolā' benachen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjayde' liže'. ⁸ Na' bene' ca' besele'ede' can' goquen' besežebchgüe'. Na' gosonxene' Diosen' dan' be'e yela' guac che Jesúsen'.

Jesúsen' gwleje' Mateo cont goque' txen len le'

(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwyejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan bene' güechixjw na' len yebale bene' güen da' xinj na' len bene' ca'

zjanaque' txen len le'. ¹¹ Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxeçhen' ben' chsed chlo'ede' le'e che'ej chagwlene' txen bene' güeçhixjw na' yebale bene' güen da' xinj?

¹² Na' cate' Jesúsen' bende' xtiža'gaquen' na' gože' leaque':

—Bene' cbi chesacšene bitw cheseyažjde' bene' güen rmed. Bene' chesacšende', leaquen' cheseyažjde' bene' güen rmed. ¹³ Le šjased bi zeje Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosen' zedeneyoeda' cont yesyetenjde' xtolen', san bene' güen da' xinjen'.

Gosenabde' Jesúsen' bixçhen' bene' ca' zjanaque' le' txen bi gosone' gwbas

(Mr. 2:18-22; Lc. 5:33-39)

¹⁴ Nach bene' ca' chesone' txen len Juan ben' bzoe' bene' nis gosebigue' lao Jesúsen' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' txen bi chesone' gwbas. ¿Bixçhen'?

¹⁵ Nach gož Jesúsen' leaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' leaque'? Še zoa ben' bšagnan' bi gac yesegüine'de'. Perw žin ža cate' bich soe' len leaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

16 'Nono zoa be_{ne}' ch_{ch}ine' lache' cobe cont yoda' xe' da' de'e_{xo}', le lache' coben' ye_{ben}' cate' chiben' na' chezan' lache'e_{xon}', na' gan' nchezan' gacchen da' xen. 17 Na' le_{cze} ne_{ca} zoa be_{ne}' chgue'e vino cobe lo' bzod yide'e_{xo}', le vino coben' ch_{son}' yide'e_{xon}' na' la_{je} vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole be_{ne}' gwdane' xe'

(Mr. 5:21-43; Lc. 8:40-56)

18 Na' ne' choe'te Jesúsen' dižan', bžin to be_{ne}' gwnabia' bzoa xibe' lao Jesúsen' na' gože'ne':

—Za' gotte to xi'in_a' no'ole. Yo'ošca x_{oa} taco' yichjbe' cont yebambe'.

19 Na' gwzoža' Jesúsen' na' gwche'e be_{ne}' ca' zjanaque' le' txen ja'aclene' be_{ne}' gwnabian'.

20 Na' šlac zja'aque' liž be_{ne}' gwnabian' zej to no'ole nagüe' le_{gaque}', be_{ne}' ba goc šižin_w iz chzoe' gw_{bao}', na' bene' byen gw_{bigue}' cože' Jesúsen' gwdane' lox xen'. 21 Le bene' x_{bab} lo' yichjlažda'ogüen', gwne': "Con še ba gwdana' xen' nach yeyacda'." 22 Na' gwye_{chj} Jesúsen' ble'ede' no'olen', gože'ne':

—Bendiplažo' xi'in_a'. Ba beyacdo' dan' chejni-lažo' neda'.

Na' la' beyactede'.

23 Cate' bžin Jesúsen' liž be_{ne}' gwnabian' na' ble'ede' be_{ne}' zan zjaže' chesone' sšag chese-bežchgüe' na' ba nita' be_{ne}' chosocuež bžejo par yosocuaše'be'. 24 Na' gože' le_{gaque}'

—Le yechoj ngale. Bi' no'ole daon' biṇa' gatbe', san chtasben'.

Na' beṇe' ca' bosoxiže' gosonle' che'. ²⁵ Na' beyož bešaše' yogo'lol beṇe' ca', nach gwyo'o Jesúsen', beṇue' taca' bi' no'ol guaten', na' beyasbe'. ²⁶ Na' ca nac yela' guac dan' ben Jesúsen', gwxoa diža' chen yogo' yež dan' zjachi' do na'.

Jesúsen' beyone' chope beṇe' lchol

²⁷ Cate' beza' Jesúsen' len beṇe' ca' zjanaque' le' txen, ja'aclen chope beṇe' lchol legaque' na' gosene' zižje:

—Le' naco' xi'in diaža che da' rey David, beyaše'laže'sca neto'.

²⁸ Na' cate' Jesúsen' len beṇe' ca' zjanaque' le' txen besežine' yo'o gan' zjanite' na' besyeyo'e, na' lecze goso'o beṇe' lchol ca'. Nach Jesúsen' gože' legaque':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca nac dan' ben Jesúsen' len legaque'.

Jesúsen' beyone' to beṇe' bi goc nie'

³² Na' cate' besyeya'ac beṇe' ca', la' besežinte beṇe' yoble zjanči'e to beṇe' bi goc nie', na' yo'o

yaz da' xigüen' yichjlažda'ogüen'. ³³ Jesúsen' be-beje' da' xigüen' na' la' beñete bena'. Na' beñe' zan besele'ede' can' goquen' besyebanchgüede', na' gosene':

—Chio' beñe' Israel, da' nechon' za' ble'echo yela' guac dan' nac ca'.

³⁴ Perw na' beñe' fariseo ca' gosene':

—Satanás dan' nac xan da' xigüe' ca' chacle-nen le' cont chebeje' da' xigüen' zjayo'o zjanyaz yichjlaždao' beñe'.

Jesúsen' cheyaše' cheži'ilaže'de' benachen'

³⁵ Na' Jesúsen' len beñe' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' beñe' Israel lo' yodao' čhegaque' ca', gwdixjue'ede' diža' güen can' nabia' Diosen' yichjlaždao' beñe' yosozenag čhe'. Na' Jesúsen' beyone' beñe' ca' chese'e bite'teze yižgüe' na' bite'teze da' chesac čhegaque'. ³⁶ Na' ble'ede' ba besežag beñe' zan na' beyaše' beži'ilaže'de' legaque', le' gocbe'ede' chesacžejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'. ³⁷ Nach gože' beñe' ca' zjanaque' le' txen:

—Chyažje beñe' zan yeseyixjue'ede' xtiža' Diosen', perw to čhopga beñe' nita' yeseyixjue'eden'. Na' beñe' yosozenague' čhe Diosen' zjazaca'lebe' ca to coseš xen da' chyažjen yedoben. ³⁸ Da'nan' le nabe Xancho Diosen' seła'che' beñe' yesaclene' chio' yotobcho coseš čhen'.

10

Jesúsen' gwleje' beṇe' šižinw ca' gosaque' txen len le'

(Mr. 3:13-19; Lc. 6:12-16)

¹ Jesúsen' botobe' beṇe' šižinw ca' zjanaque' le' txen na' bnežjue' legaue' yela' gwnabia' cont besyebeje' da' xigüe' lo' yichjlaždao' beṇe', na' cont besyeyone' beṇe' bite'teze yižgüe' da' chese'ede' na' bite'teze da' chesac čegaue'.

² Quinga zjale beṇe' šižinw ca': Simón ben' lecze le' Pedro ben' goque' beṇe' blao, na' Andrés beṇe' biše' Pedroa', na' xi'in Zebedeon' Jacobo len Juan, ³ na' Felipe, na' Bartolomé, na' Tomás, na' Mateo ben' goc beṇe' güečhixjw, na' Jacobo xi'in Alfeo, na' Lebeo ben' lecze le' Tadeo, ⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

Jesúsen' gwsele' beṇe' šižinw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' beṇe' šižinw ca' jasedixjue'ede' xtiža' Diosen', gože' legaue':

—Bitw šejle laž beṇe' cbi zjanaque' beṇe' Israel, na' neca šejle yež ca' zjachi' distritw Samaria.

⁶ Le šja'ac gan' že' beṇe' Israel beṇe' ba zjambiyi' dan' bitw na' yesombi'e Diosen'. ⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' beṇe' yosozenag čhe'. ⁸ Le yeyon beṇe' chesacšene, le yeyon beṇe' ca' chese'e yižgüe' dan' nzi' lepra, le yosban no beṇe' ba gosat, na' le yebej da' xigüe' ca' zjajo'o zjanyaz lo' yichjlaždao' beṇe'. Diosen' bibi bchixjue' le'e da' ba beṇe' le'e

yela' guac chen' cont gonle da' quinga, da'nan' le gaclen bene' na' bibi gwchixjwlene'.

⁹ Bitw gua'le mechw de oro, de plata o de cobre šlac co'ole nez. ¹⁰ Na' neca gua'le bzod, o yeto xcamisle, neca gua'le yel, na' neca goxe'le xis da' gwchiše'le. Ca nac le'e chonle xšinan' zaca'le par gon bene' da' ye'ej da' gagwle gan' sela' le'ena'.

¹¹ 'Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. ¹² Na' cate' žinle liže'na', le gwguape' tiox, na' le nabraže' soa cueze' binlo len yichjlažda'ogüe'. ¹³ Na' še nita' bene' chesaclačže' yesezoa yesebeze' binlo len yichjlažda'ogaquen', na' gac can' gwnabraže'le par yesezoa yesebeze' binlo. Perw še nono zoa bene' chesaclačže' yesezoa yesebeze' binlo len yichjlažda'ogaque', bi gac dan' ba gwnabraže'len'. ¹⁴ Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nachbia' bi checa'ale chegaque'. ¹⁵ Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesale'chde' cllel ca bene' Sodomán' na' bene' Gomorran'.

Gac da' saca'zi'cho

¹⁶ 'Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nan' cheyala' gacle bene' yo'ochgua xbab na' bene' xenlaže' len legaque'. ¹⁷ Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnabia'

ca' cont yesot yeseyine' le'e lo' yodao' chęgaquen'.
 18 Nach ľecze dan' chejnilaże'le neda' nita' bene'
 yesęche'ęoxje' le'e do lao rey, do lao nochle bene'
 gwnabia'. Na' can' güe'lenľe ľegaque' xtiżan', ľecze
 can' güe'lenľe xtiżan' len bene' bi zjanaque' bene'
 Israel. 19 Perw cate' yesezene' le'e na' yesęche'e
 le'e lao bene' ca', bi cuec yichjle nac yoži'ile
 xtiża'gaquen' o nacle nľale. Lo hor na'teze Diosen'
 gwzejni'ide' le'e bin' cheyaľa' nľale. 20 Le gague
 le'eczen' nľele, san Spiritw che Xacho Diosen' gonen
 ga nľale bin' cheyaľa' nľale.

21 'Cana' bal benľach yesęchje' yesone' bene' biše'
 golje' lo na' bene' yesote' ľegaque', na' nita' bene'
 yesone' xi'ingaque' lo na' bene' yesot ľegacbe', na'
 nita' bene' yesone' xaxne'e lo na' bene' yesote'
 ľegaque'. 22 Yogo'ze bene' yesęgue'ede' le'e dan'
 chejnilaże'le neda', perw note'tez le'e gwyo
 gwčhejlaże'le cont bi cuejyichjle dan' chejnilaże'le
 neda' žinten gatlę, nach šjayzoale len Diosen'. 23 Še
 bene' že' to yež yosyolague' le'e, ľe yeza'teze na'
 yeyejle ga yoble. Biľa' yeyoż šjatixjue'ele xtiżan'
 yogo' yež gan' že' bene' Israel ca' cate' yida' da'
 yoble, neda' naca' ben' gwsęľa' Diosen' golja'
 benľach.

24 'Ca nac cate' to bene' chsede' len to maestrw,
 bitw nľacho naque' bene' blaoch ca maestroa'. Na'
 to mos bitw naque' blaoch ca xanen'. 25 Con
 cheyaľa' čhazlaże' ben' chseda' še yežinľaże' gague'
 ca maestrw che' na' cheyaľa' čhazlaże' mosen' še
 yežinľaże' gague' ca xanen'. Neda' naca' Xanľe,
 na' bene' chesęgue'ede' neda' chesene' chona' txen
 len Beelzebú dan' nac xan yogo' da' xigüe', na'

naquechxe yesene' che le'e nacle neda' txen.

Cheyala' žebcho castigw dan' gon Diosen' che bene' güen da' xinj

(Lc. 12:2-9)

²⁶ 'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

²⁷ Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'iden'. ²⁸ Bitw cheyala' žeble bene' ca' yesot le'e. Legaque' bitw gac bi yesonde' yichjlažda'olen'. Cheyala' žeble Diosen', le len' nape' yela' gwnabia' cont gwžiaye'e cuerp chelen' len yichjlažda'olen' lo yi' gabilen'.

²⁹ 'Nezecho byine dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje. ³⁰ Na' ca nac chio', chaquechgüe Diosen' chio' na' neztede' bal yiša' yichj to tocho žia. ³¹ Da'nan', bitw žeble, le zaca'chle clel ca zan byin dao' ca'.

Cheyala' güe'cho diža' len bene' ye'cho legaque' nombia'czcho Jesucriston'

(Lc. 12:8-9)

³² 'Na' note'teze bene' še cho'e diža' len benachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen. ³³ Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

Yesedile bene' neche dan' bid Jesúsen'
(Lc. 12:51-53; 14:26-27)

³⁴ 'Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'. ³⁵ Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'. ³⁶ Bene' lo' yo'oze yesegue'e lježe'.

³⁷ 'Note'tez bene' še chaquechde' xe' o xne'e clél ca chacde' neda', bitw zaque' gone' txen len neda'. Lecze ca' še chaquechde' xi'ine' clél ca neda' bitw zaque' gone' txen len neda'. ³⁸ Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gaque' neda' txen še ca'. ³⁹ Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocané.

Bene' ca'yesenita' mbalaz cate' yesyežine' yaba
(Mr. 9:41)

⁴⁰ 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'. ⁴¹ Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaue' da' chesone' can' chazlaže' Diosen', lecze mbalaz soe' caten' yežine' yaban'. ⁴² Note'teze bene' gwnežjue' la' to xiga'ze nis ye'ej bene' chejnlaže' neda', la'

gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesúsen'

(Lc. 7:18-35)

¹ Cate' beyož ben Jesúsen' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwseła' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsen', ³ jaseže'ne':

—¿Len' naco' ben' chbezto' seła' Diosen', še cheyala' cuezchto' yid bene' yoble?

⁴ Nach Jesúsen' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. ⁵ Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'. ⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'. ⁸ ¿Nac naque' caten' jale'elne'? ¿Nyaze' lache' šagüe'? ¿še bitw? le bene'

zjanyaz lache' šagüe' nite' yo'o güenchgua ca no liž beñe' gwnabia'. ⁹ ¿Noxen' jale'ele? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze beñe' choe' xtiža' Diosen'. ¹⁰ Čhe benga nyojen le'e Xtiža' Diosen', žan:

Neda' Dios seļa' to beñe' cuialagüe' laguo' güe'e xtižon'

cont cate' šejo' ba zjanita' beñe' yosozenague' čhio'.

¹¹ Da' li žia' le'e notoch no beñach na' soa beñe' naquech beñe' blao ca Juanna' ben' bzoe' beñe' nis. Perw na' note'tez beñe' chzenague' čhe Diosen' cont nabia' Diosen' yichjlažda'ogüen', la'czla' naque' beñe' la'zelagüe beñe' bibi zaca', ba chejni'ichde' čhia' clel ca Juanna'.

¹² 'Gwzolaon caten' Juanna' gwdixjue'ede' xtiža' Diosen' na' bzoe' beñe' nis na' chžinten na'a, beñe' zan chesone' ga zelao chesezaquede' cont nabia' Diosen' yichjlažda'ogaque'. ¹³ Na' lecz gwzolaon cani'te bžinten cate' bla' Juanna' gwdixjue'ede' xtiža' Diosen', ley dan' bzoj da' Moisés na' dan' bosozoj yezica'chle beñe' goso'e xtiža' Diosen' bzejni'in chio' čhe yela' gwnabia' čhe Diosen'. ¹⁴ Na' Xtiža' Diosen' dan' nyojen žan yid yeto beñe' yedeyene' can' ben Elías ben' be' xtiža' Diosen' cani'. Čhe Juanna' žan ca', con še šejle'le. ¹⁵ Le'e žia nagle da' chene, le gwzenag xtiža'na'.

¹⁶ '¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe':

¹⁷ “Ba bcuežto' bžejo, neca bya'ale, na' ba bilyaše'to', neca gwchežle.” ¹⁸ Juan ben' bzoe' beñe' nis bide' laole nga, bitw güe'ej gwdagwšagüe' can' chese'ej chesagw beñe' yoble, nach gwnale čhe: “Yo'o yaz

da' xigüen' yichjlažda'ogüe'." ¹⁹ Na' neda', Diosen' gwsele' neda' golja' benach, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güechixjw ca' na' xmigw yezica'chle bene' güen da' xinj. Perw nachbia' yela' sina' che Diosen' dan' napto' naquen da' güen, le ba ble'eczele can' chon neto' napton'.

Yež ca' gan' bitw bosozenague' che Jesúsen'
(Lc. 10:13-15)

²⁰ Nach Jesúsen' be'e xtiža' bene' ca' že' yež ca' gan' bene' da' zan da' zaca' yesyebande', na' gwdile' legaque' dan' bitw besyetenjde' xtola'gaquen'. Nach gwne':

²¹ —jNyaše'chguaze gac che le'e bene' Corazín! jNyaše'chguaze gac che le'e bene' Betsaida! Bene' ca' nita' Tiro na' Sidón ba besyetenjde' xtola'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogaquen'. ²² Žia' le'e, saca'zi'chle cllel ca bene' že' Tiro na' Sidón cate' žin ža gac juisyw. ²³ Na' le'e nita'le Capernaum chonle xbab šeca Diosen' gone' gacxenchgualle cate' yežinle yaba gan' zoe'na'. Bi gone' ca', san sele' le'e lo yi' gabil. Šeca' bena' da' zaca' yesyebane bene' ca' gwnita' Sodoman' can' ba bena' laole nga, zesyetenjde' xtola'gaquen', na' ne' chi' ciudan' šeca'. ²⁴ Žia' le'e, gale'chle cllel ca bene' Sodoman' cate' žin ža gac juisyw.

Beṇe' ca'yesejnilaže' Jesúsen' nite' mbalaz
(Lc. 10:21-22)

²⁵ Nach Jesúsen' bol güiže' Diosen', gwnē':

—Xa', le' naco' Xan yežlio nga na' Xan yaba, chnabi'o doxen. Na' choṇa' yela' choxclen chio' ba bzejni'ido' bal beṇe' diža' güen chio' quinga. Bzejni'ido' beṇe' ca' gosacbe'e cheseyažide' no gwsed gwlo'e legaue'. Na' bitw bzejni'ido' beṇe' ca' che-son xbab zjanaque' beṇe' sina' na' beṇe' zjanejni'i.

²⁶ Beno' ca' Xa', le can' gwnalažo'.

²⁷ Na' gože' beṇe' ca' že'na':

—Xan' ba bene' lo na' gona' cont chombia' beṇe' le'. Le' nombia'yaṇe' neda', na' neda' nombia'yaṇa' le'. Na' beṇe' ca' ba gwleja' ba zjanombi'e Xan'. Na' noch no zjanita' beṇe' zjanombi'e Xan', ne neda' ca zjanombi'e. ²⁸ Le'e chjaxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. ²⁹ Le gwzenag chia' na' gwzejni'ichda' le'e. Neda' naca' beṇe' xenlaže' na' beṇe' šagüe' na' gona' ca soale mbalaz lo' yichjlažda'olen'. ³⁰ Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

12

Ža che Dios bene' ca' zjanaque' Jesúsen' txen
goselechje' trigon' da' gosagüe'
(Mr. 2:23-28; Lc. 6:1-5)

¹ Ca tiempen' gozac to ža che Diosa' cate' Jesúsen' gwdie' len beṇe' ca' zjanaque' le' txen gan' nyaž trigw. Nach beṇe' ca' gosedone', na' goselechje' dao che trigon' cont gosagüe' xsenna'. ² Na'

besele'e be_{ne}' fariseon' can' gosone', na' gosi'e Jesúsen':

—Gw_{na}šc ħbix_{chen}' be_{ne}' ca' zjanaque' le' txen chesone' žin da' bi de l_{sens} goncho ža ħhe Dios?

³ Na' Jesúsen' gože' l_{egaque}':

—ħBi_{na}' gw_{lable} can' ben da' rey Davin' to ža cate' le' na' be_{ne}' l_{ježe}' ca' gosedone'? ⁴ Gwyo'o Davin' ga nac liž Dios na' gw_{dagüe}' yetextil da' nac ħhe Dios da' bi chac gagw be_{ne}' bi nac b_{xoz}, na' l_{ecze} bnežjue' ħhe be_{ne}' zja'ac len le'. ⁵ Na' ħbi_{na}' gw_{lable} le'e ley dan' bzoj da' Moisés gan' žan b_{xoz} ca' chesoncze' mandadw ħhe yodao' blaon' yogo' ža ħhe Diosen'? Na' bitw n_{acho} zjanape' do_{la}' dan' chesone' žin ža ħhe Diosen'. ⁶ Žia' le'e, neda' zoa' nga zaca'cha' clel ca yodao' blaon'. ⁷ Xtiža' Diosen' dan' nyojen žan: “Čaclaža' yeyaše' yeži'ilaže'le be_{ne}', gague con gotle beyixe' par gonxenle neda'.” Šaca' chejni'ile bi zejenna' žan ca', bilja n_{ale} be_{ne}' quinga zjanape' do_{la}', le bibi da' mal chesone'. ⁸ Žia' le'e, naquen' lo na' n_{ia}' bi da' nac güen goncho cate' nac ža ħhe Diosen', neda' naca' ben' gwsela' Diosen' golja' be_{nach}.

Beyac to be_{ne}' n_{xo}'o_n šla'a taque'

(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to lo' yodao' ħhe ħchio' be_{ne}' Israel. ¹⁰ Na' lo' yodaon' zoa to be_{ne}' n_{xo}'o_n šla'a taque', nach be_{ne}' fariseo ca' gose'e Jesúsen':

—ħDe l_{sens} yeyoncho be_{ne}' xinj ža ħhe Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' l_{egaque}':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, ěcbi la' yebejteleba' lo' yechon' lo žana'?
 12 Da'na'na' žia' le'e de lsens gaclencho bene' ža che Diosen'. Le zaca'ch to bene' clcl ca to xila' dao'.

13 Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a. 14 Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

15 Gocbe'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' le', nach beyone' yogo' bene' ca' chesacšene. 16 Na' bene' mandadw nono yesoe'lene' diža' non' beyon legaque'. 17 Bene' ca' cont goc can' ža Xtiža' Diosen' dan' bzoj da' Isaíasen', žan:

18 Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' sela' Spiritw chian' soateze soan len le'.

Na' chixjue'ede' yogo'lol bene' can' chazlaža' yesone'.

19 Bitw gacyože' len bene', neca yosye'e,

na' neca nie' zižjo lo nez cont yesene bene' bin' že'.

20 Bi gwzoe' ca'ale bene' chesejnilaže' le' late' lasze. Soe' gaclene' legaque'.

Nach žin ža gone' cont gac con da' zej to licha lo yežlion'.

21 Na' bene' že' yogo' naciónna' yesebeze' gaclene' legaque'.

*Gosene' Jesúsen' bebeje' da' xigüe' len yela' guac
che Beelzebú*

(Mr. 3:19-30; Lc. 11:14-23; 12:10)

²² Na' zoa to bene' lchoł na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte bene'. ²³ Na' yogo' bene' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

²⁴ Perw cate' bene' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

²⁵ Gocbe'e Jesúsen' can' goson bene' fariseo ca' xbaben', nach gože' legaue':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še bene' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague sša yesenite' txen. ²⁶ Lecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' chen, le chdillen cuinen še ca'. ²⁷ Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze ze-jen Beelzebú dan' chnabia' da' xigüen' chaclenen bene' lježle chesybeje' da' xigüe' zjajo'o zjanyaz yichjlaždao' bene'. Na' bene' lježle ca'ze chosolo'e

clelen' chñele. ²⁸ Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

²⁹ '¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala'? Lete gone' ca' nach gac que'e bi da' de che'.

³⁰ 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

³¹ 'Da'nan' žia' le'e, yogo' da' xinj da' chon beñach, na' yogo' diža' bya' dan' chesene' che Diosen', Diosen' yezi'xene' chen, perw note'teze bene' chñe' yela' ya' che Spiritw che Diosen', gwbat yezi'xen Diosen' che'. ³² Na' note'teze bene' še ne' yela' ya' chia' neda' naca' ben' gwsela' Diosen' golja' beñach, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'

(Lc. 6:43-45)

³³ 'Ca nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. ³⁴ Na' ca'czen' nac len le'e nacchgualle bene' zgot na' bene' gwxiye'. Bitw gac güe'le diža' šagüe' dan' nacle bene' laždao' xi'a. Le yogo'te diža' da' chchoj cho'achon', lo' yichjlažda'ocho nan' za'aquen. ³⁵ To bene' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to

be_{ne}' laždao' xi'a cho'e diža' xi'a, le can' ža lo' yichjlažda'ogüen'. ³⁶ Na' žia' le'e, cate' žin ža gon Diosen' yesežagla_o yogo' be_{ne}' cheson da' xinj toli toca_{ne}, cana' yogo'lo_l be_{ne}' yosodie' cuent che yogo' diža' dan' ba goso'e da' bitwbi zjazacan'. ³⁷ Na' con ca diža' dan' choe'le, Diosen' choglagüen' chele še naple dola' o še bi naple dola'.

Be_{ne}' bi bosozenag che Diosen' gosenabe' gon Jesúsen' to yela' guac
(Mr. 8:12; Lc. 11:29-32)

³⁸ Nach ba_l be_{ne}' ca' chososed chosolo'e dan' bzoj da' Moisés, na' be_{ne}' fariseo ca' gose'e Jesúsen':
—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

³⁹ Nach Jesúsen' gože' legaue':

—Le'e zoale na'a nacchgual_e be_{ne}' laždao' xi'a na' ba gwlejyichjle Diosen'. Na' ch_nable gona' yeto yela' guac da' le'ele cont nezele še Diosa' gwsele' neda', perw bi gona' can' ch_nabl_ena', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonásen' ben' be' xtižen' cani'. ⁴⁰ Cate' za' šej Jonásen' Nínive, Diosen' bene' cont to bel xen be yo'o lo' nisdaon' gwdebba' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel. ⁴¹ Na' cate' žin ža gon Diosen' cont yogo' be_{ne}' cheson da' mal yesežaglagüe' toli toca_{ne}, žana' be_{ne}' Nínive be_{ne}' ba gosat yedese_cuiše' le'e mbanle na'a lao Diosen', le legaue' besy_etinjde' xtolen' cate' da' Jonásen' gwdixjue'ede' xtiža' Diosen' len legaue'. Na' neda' zoa' nga naccha' be_{ne}' blao cl_el ca da'

Jonásen', na' bitw chzenagle chia'. ⁴² Na' lecze žana' cate' gon Diosen' cont yogo' bene' cheson da' mal yesežaglaogüe' toli tocanē, da' no'olen' gwnabia' bene' Seba ca' yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clēl ca da' rey Solomónna', na' bitw chzenagle chia'.

Da' xigüen' cheyo'on da'yoble lo'yichjlaždao' bene' (Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan:
⁴⁴ “Da' yoble šjajo'a lo' yichjlaždao' ben' gan' ba gwyo'a.” Nach yeyejen da' yoble gan' zoa ben'. Cate' le'en bač beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, ⁴⁵ nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clēl ca goc che' cana'. Can' goc che bena', lecze ca' gac che le'e mbanle na'a dan' nactecle bene' laždao' mal.

Xna' Jesúsen' len bene' biše' ca' besežine' ga zoe' (Mr. 3:31-35; Lc. 8:19-21)

⁴⁶ Ne' choe'te Jesúsen' diža' len bene' quinga, cate' bžin xne'e len biše' ca'. Gosaclaže' yeso'e yesoe'lene' le' diža' na' bene' zan nita' lagüe' na'ate.
⁴⁷ Bene' ca' že' na', toe' gože' Jesúsen':

—Xna'o len bene' bišo' ca' zjanite' chyo'o na' chesaclaže' yesoe'lene' le' diža'.

⁴⁸ Nach Jesúsen' gože' le':

—¿Nezele no nac x̱a'a na' no zjanac biše' lježa'?

⁴⁹ Nach bḻi ne'e blo'e beṇe' ca' zjanaque' le' txen na' gože' bena':

—Beṇe' quinga zjanaque' x̱a'a na' zjanaque' biše' lježa'. ⁵⁰ Le note'teze beṇe' chone' da' chnalaže' X̱a' Diosen' ben' zoa yaban', bena' nac beṇe' biša', beṇe' zana', lecze naque' x̱a'a.

13

Jempl che beṇe' goz trigon'

(Mr. 4:1-9; Lc. 8:4-8)

¹ Na' lo žana' gwza' Jesúsen' yo'o gan' zoen' jači'e cho'a nesdaon'. ² Nach catec beṇe' zan juisyw besedobe' gan' chi'en' na' benten byen gwyo'e gwchi'e to lo' barcw. Na' yogo' beṇe' ca' besedoben' gosente' cho'a nesdaon' ga nac yo biž. ³ Nach da' zan da' bsd blo'e Jesúsen' legaue' len jempl da' bi'e. Na' be'e to jempl, gwne':

—To beṇe' güen žin jeze' trigw, ⁴ na' šlac zej chose' trigon' late' bin che trigw dan' chazen' jasechazen chanez, nach be ca' žia x̱il be chaš le'e yaba gosagwban'. ⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. ⁶ Perw na' cate' bla' gwbiža' na' bzejen len na' gosebižen, le gague zjajo'otec loenna' sitjw. ⁷ Yelaten' jasechazen ga nac lo yag yeše', na' yag yešen' gosecha'on na' bosololen len. ⁸ Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje. ⁹ Le'e žia nagle da' chene, le gwzenag xtižan'.

*Jesúsen' be'e diža' bixchen' bzejni'ide' beṇe' jempl
(Mr. 4:10-12; Lc. 8:9-10)*

¹⁰ Nach beṇe' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' beṇe' quinga len jempl?

¹¹ Na' gož Jesúsen' legaue':

—Nono na' neze can' nac yela' gwnabia' che Diosen', na' ba chone' cont le'e chejnilaže'lene' nezelen. Perw bi chon Diosen' ca' len beṇe' bi chesaclaže' yesejnilaže'ne'. ¹² Note'teze beṇe' chosozenague' xtiža' Diosen', gwzejni'ich Diosen' legaue' cont šanch dan' yesejni'ide'. Perw na' note'teze beṇe' bi chosozenague', da' daon' ba zjaṇezde', yeca'a Diosen' len. ¹³ Da'nan' chsed chlo'eda' beṇe' quinga len jemplen', le chesele'ede' dan' chona' perw bitw chesacbe'ede' bi zejen, na' chesende' xtižan' perw bitw chesejni'iden'. ¹⁴ Len beṇe' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yene-len'.

Na' da' li le'ele, perw bi gache'ele bi zejen dan' le'elen'.

¹⁵ Nacle beṇe' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle beṇe' güedenag.

Šaca' bi nacle beṇe' güedenag, šejni'ile bi zejen dan' chenele na' dan' chle'ele.

Nach yetiṇjele xtola'le cont yeca'an na' yocoba' yichjlažda'olen'.

16 'Perw le'e nacle neda' txen, leca mbalaz zoale dan' chle'ele da' ca' chona' na' chache'ele bi zejen, na' chzenagle xtižan' na' chejni'ilen. 17 Da' li žia' le'e, zan da' beṇe' ca' gosoe' xtiža' Diosen' cani' na' zan da' beṇe' ca' yezica'chle beṇe' bosozenag che Diosen' cani', gosaclačže'chgüe' yesele'ede' dan' chle'ele na'a, perw bitw goḷa' yesele'eden'. Na' gosaclačže'chgüe' yesende' dan' chenele na'a, perw bitw goḷa' yesenden'.

Jesús'en' bzejni'ide' bi zejen jempl che ben' goz trigon'

(Mr. 4:13-20; Lc. 8:11-15)

18 'Na' le gwzenag, quinga zejen jempl che ben' goz trigon'. 19 Ca dan' byažen zejen xtiža' Dios da' chzejni'i che yela' gwnabia' che'. Na' biṇ dan' beselažo' chanezen', zejen beṇe' ca' chesende' xtiža' Diosen' perw bi chesejni'idēn'. Na' ca cheyoža' chžin gwxiyen' chebejen xtiža' Diosen' lo' yichjlažda'ogaquen'. 20 Na' biṇ dan' beselažo' ga nac lo yej na' bi ben loen, zjanaquen ca beṇe' la' chesyebetede' xtiža' Diosen' cate' chesenden', 21 perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal čhegaquen' o cate' chesegue'e beṇe' legaque' dan' chosozenague' xtiža' Diosen', la' chesebejyichjte' xtižen'. 22 Na' biṇ dan' beselažon' ga nac lo yag yeše', zejen ca beṇe' ca' ba zjanende' xtiža' Diosen', perw šlac zjambane' chesyelal chesyēžejde' na' da' chesaclačže' yeseni'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyala'. 23 Na'

biṇ dan' beselažo' lo yo šagüe' zejen ca beṇe' chesende' xtiža' Diosen' na' chesejni'iden' na' chosozenaguen'. Baḷen gosebian to gayoa güeje, na' yebaḷen gosebian gayon güeje, na' yebaḷen šichoa güeje.

Jempl che trigon' na' yixe'

²⁴ Na' gozoe'len Jesúsen' beṇe' ca' yeto jempl, goze'e legaue':

—Yela' gwnabia' che Diosen' ben' zoa yaban' zaca'leben ca dan' goquen' cate' to beṇe' jeze' trigw lo yežlio che'na'. ²⁵ Na' do šeže'le gwyej to beṇe' chgue'e le' šlac chesetas beṇe' ca' yezica'chle na' jeze' xsa yixe' gan' ba naz xan yežlion' trigon', nach beze'e. ²⁶ Na' to ši'ize trigon' len yixe' ca' beselan', na' trigon' gwzolao chbian. ²⁷ Na' beṇe' güen žin che xan yežlion', cate' gosache'ede' nach jaya'aque' gan' zoa xangaue' jasyeyeže'ne': “Beṇe', ¿gague biṇ trigon' goz yežlio chion? ¿Bixchen' nchixen len yixe'?” ²⁸ Nach xangaquen' gože' legaue': “To beṇe' chgue'e neda' jen ca'.” Nach xmosen' gose'ene': “¿Che'ndo' lažo'to' yixen'?” ²⁹ Na' gože' legaue': “Bitw lažo'len. Le xož lažo'le lente trigon'. ³⁰ Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjaytoble trigon' co'ošagüe'len.”

Yela' gwnabia' che Diosen' naquen ca biṇ che xomdas

(Mr. 4:30-32; Lc. 13:18-19)

³¹ Nach gozo'e yeto jempl, gozne':

—Šanch beṇe' yosozenag che Diosen' cont nabi'e yichjlažda'ogaue'. Da'nan' yela' gwnabia' che

Diosen' ben' zoa yaban' zaca'leben ca to bin che xomdas dan' goz to bene' yežlio chen'. ³² Bin che xomdasen' chnabia' nac da' dao' len bin ca' chazcho. Perw na' cate' chlan' chcha'ochen ca bichle yixe' cuan na' chaquen ca to yag cha'o, nach byin dao' ca' chjasen ližda'ogacba' lo xozenna'.

*Yela' gwnabia' che Diosen' naquen ca levadura
(Lc. 13:20-21)*

³³ Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

*Jesúsen' bzejni'ide' bene' len jempl
(Mr. 4:33-34)*

³⁴ Yogo' da' quinga bsd blo'e Jesúsen' bene' ca' besežag gan' zoe'na'. Bsd blo'ede' legaue' be'e jempl, bitwbi bzejni'ide' legaue' sin ca be'e jempl.

³⁵ Bene' ca' cont goc can' bzoj da' bene' be' xtiža' Diosen' cani', žan:

Gwsed gwlo'egacda'ne' len jempl,
na' yapegaca'ne' dan' nono na' neze da' ba ngaše'
cate' gwxete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsd blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaue':

—Quinga zejen: Diosen' gwsele' neda' golja' beṇaḥ na' zaca'lebda' ca ben' goze' biṇ che trigon'.
³⁸ Na' doxen yežlio nga zaca'leben ca pedas yežlio gan' goze' trigon'. Na' beṇe' ca' chosozenague' che Diosen' cont nabi'e yiḥjlažda'ogaque' zaca'lebde' ca biṇ che trigon'. Na' beṇe' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'.
³⁹ Satanásen' zaca'leben ca beṇe' chxi'a ben' goze' xsa yixen'. Na' žan' gac juisyw zaca'leben ca žan' yosytobe' trigon'. Na' angl ca' zaca'lebegaque' ca beṇe' ca' yosytobe' cosešen'.
⁴⁰ Na' can' šey yixen' yosytoben', can' gac che beṇe' ca' chosozenag che Satanásen' cate' žin ža gac juisyon'.
⁴¹ Diosen' gwsele' neda' golja' beṇaḥ na' cate' žin ža, neda' sela' angl chia' ca' cont yosytobe' yogo' beṇe' ca' chesego'oyele' beṇe' yoble yesone' da' mal na' lecze yosytobe' yezica'chle beṇe' cheson da' mal. Na' angl ca' yesyebeje' legaque' cont bich yesenite' txen len beṇe' ca' chosozenague' che Diosen' cont nabi'e yiḥjlažda'ogaquen'.
⁴² Nach yesesele' legaque' lo yi' gabil gan' yeseye' toli tocanē. Na' yesebežyaše' yesagwxejte laye' tantw yesežaglaochgüe'.
⁴³ Cana'ch Xacho Diosen' gone' cont beṇe' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To beṇe' bželde' mechw xen da' ngaše' to lo' yežlio. Nach bocuašen' da' yoble lecze na'ze na'

chebechgüede' beze'e jayete' yogo'lol bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ 'Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan. ⁴⁶ Na' bželde' to perla da' leca zacan'. Na' beyote' yogo'lol bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

Jempl che yixjw bel

⁴⁷ 'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bal bene' gwxcen bel na' bosozale' yixjw bel chegaquen' lo' nisdan' na' gwxcenen zan cuen bel. ⁴⁸ Nach cate' ba gwža' lo' yixjon', besyebejen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. ⁴⁹ Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen' ⁵⁰ na' yosozale' legaue' lo yi' gabil gan' yesebežyaše' na' yesagwxejte laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' le' txen: —¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsen' legaue':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'lol da' zaca' dan' chyažj chchinde', balen zjanaquen da' cobe na' balen zjanquen da' gole.

Bene' yež Narzaret bi gosejle'e che Jesúsen'
(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' le' txen ⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' čhegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' ¿nacxečen' chac chone' yela' guac ca'? ⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. ⁵⁶ Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž čhegaque', bi gosaclačže' yesejle'e che'. Na' gož Jesúsen' legaque':

—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

⁵⁸ Na' to chopze yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa bene' nis
(Mr. 6:14-29; Lc. 9:7-9)

¹ Na' ca tiempen' Herodes ben' naque' guber-
nador che distritw Galilean', bende' diža' ca nac
yogo'loł dan' chon Jesúsen'. ² Nach gože' xmose' ca':

—Bengan' da' Juanna', ben' bzoa bene' nis.
Ba bebane' ladjo bene' guat ca', da'nan' chaque'
chone' yela' guac.

³⁻⁴ Herodesen' gwne' ca' dan' bene' mandadw
gosote' da' Juanna'. Quingan' goc: Herodesen'
beque'e Herodías ca xo'ole' la'czla' Herodías naque'
xo'ole' bene' biše' Felipe. Na' Juanna' gože' Herode-
sen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da'nan'
Herodesen' bene' mandadw gosezene' Juanna'
na' bosocheje' ni'a ne'e len gden lo' ližya gan'
gosegüe'ene'.

⁵ Herodesen' goclaže' gote' Juanna', perw bitwbi
bende' le', le gwnežde' bene' zan chesejle'e Juanna'
cho'e xtiža' Diosen', na' bžebe' bi yeson bene'
ca'. ⁶ Perw na' cate' gosone' lñin' ža la Herode-
sen', bi' no'ol che Herodías bya'abe' lao bene'
ca' ja'ac lñin'. Na' leca bebe Herodesen' can'
bya'a no'ol güegon', ⁷ na' bzoe' Diosen' testigw che'
gwnežjue'be' bite'teze nabebe' le'. ⁸ Na' gwlo'oyela'
xna'ben' lebe' cont gožbe' Herodesen':

—Ben neda' to lo platw yichj Juan ben' chzoa
bene' nis.

⁹ Ne late'ze bi gwyazlaže' rey Herodesen' gone'
can' gož no'ol güegon' le', perw bačhle bzoe' Diosen'
testigw che' lao bene' ca' jasa'ac lñin' gwnežjue'be'
bite'teze nabebe' le', da'nan' benšaze' mandadw gac
can' gwnabebe' le'. ¹⁰ Ca' goquen' bene' mandadw
jasechogue' yen Juanna' lo' ližya gan' yo'ena'. ¹¹ Na'

bosožie' yichjen' to lo platw cont bosonežjuen' no'ol güegon' na' lebe' bnežjwben' xna'be'.

¹² Nach bene' ca' zjanaque' txen len da' Juanna' jasyexi'e cuerp chen' na' jasecuašen'. Gwde na' ja'aque' gan' zoa Jesúsén' jaseže'ne' can' ba go-
quen'.

*Bguagw Jesúsén' gayo' mil bene'
(Mr. 6:30-44; Lc. 9:10-17; Jn. 6:1-14)*

¹³ Na' cate' bene Jesúsén' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nisdäon' cate' gosende' ba zjada Jesúsén', na' gosa'ac lažgaque' ja'aque' yo biž jasešague' Jesúsén'. ¹⁴ Na' cate' bžin Jesúsén' cho'a nisdäon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene. ¹⁵ Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gala'ze šjasediljue' da' yese'ej yesagüe'.

¹⁶ Nach Jesúsén' gože' legaque':

—Bitw cheyala' šjaya'aque', san le'e güe'elne' da' yesagüe'.

¹⁷ Nach gose'ene':

—Chopga bel ya'a chechon' de na' gayo'ga yetex-til dao'.

¹⁸ Nach Jesúsén' gože' legaque':

—Le šjaxin' ni.

¹⁹ Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' bel ya'a ca' chope, na' gwne'e yabale be'e yela' choxc̣len che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'. ²⁰ Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje bel dan' bega'anna'. ²¹ Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

Jesúsen' gwze'e lo nesdaon'

(Mr. 6:45-52; Jn. 6:16-21)

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nesdaon' šlac bega'an le' be-sele' bene' ca' ližgaque'. ²³ Na' beyož besele' bene' ca' ližgaque', gwloe' to lo ya'a jal güiže' Diosen' toze'. Na' cate' gol, toz Jesúsen' zoe' lo ya'an. ²⁴ Na' ca nac barcon' gan' zeseyo'o bene' ca' zjanaque' Jesúsen' txen, ba zejen do gachol nesdaon' nžiga'ses nisen' len dan' chas chata' nesdaon', le ben' chechjen clele. ²⁵ Na' do šbal beyetj Jesúsen' ya'ana' na' gwze'e lo nesdaon' na' ba zejgale' gan' zja'aquen'. ²⁶ Nach cate' besele'ede' le' zeje' lo nesdaon' leca besežebe', na' bososye'e gosene':

—iše da' chda chelen' chle'echo!

²⁷ Na' la' bol güižte Jesúsen' legaque', gože'ne':

—Le gonchach laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo nesdaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nisdaon' zeje' gan' zoa Jesús'en'. ³⁰ Perw na' cate' gocbe'ede' chečhjchgua ben', bžebe' na' gwzolao chebe' lo' nisen'. Nach bosye'e, gože' Jesús'en':

—Xana', bosla neda'.

³¹ Na' la' blite na' Jesús'en' be^{xue}'ne', na' gože'ne':

—¿Bixčhen' chac chopdo? Gweyle'ch chia'.

³² Nach cate' beyo'o Jesús'en' len Pedroa' lo' barcon', la' gwlezte be'na'. ³³ Na' be^{ne}' ca' že' lo' barcon' bosozoa xibe' lao Jesús'en' gosonxene'ne', gose'ene':

—Da' licze len' naco' doguale Xi'in Diosen'.

Jesús'en' beyone' be^{ne}' chesacšene ben' nita' Genesaret

(Mr. 6:53-56)

³⁴ Na' goselague' nisdaon' na' besežine' yežlio gan' nzi' Genesaret. ³⁵ Na' cate' be^{ne}' Genesareten' besyeyombi'e Jesús'en', goseyise' diža' yogo' yež ca' dan' zjachi' gała'ze cont gosenezde' ba bžin Jesús'en' lažgaque'. Na' be^{ne}' ca' že' yež ca' goseče'e yogo' be^{ne}' chesacšene lao Jesús'en'. ³⁶ Na' goseneyoede' Jesús'en' gwnežjue' latje yesoxe' la'ch late'ze xni'a xen'. Na' yogo' be^{ne}' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr. 7:1-23)

¹ Na' ba^l be^{ne}' fariseo ca' na' be^{ne}' ca' chososed chosolo'e dan' bzoj da' Moisés'en' gosa'aque'

Jerusalénna' na' besežine' gan' zoa Jesúsen', na' gose'ene':

² —¿Bixchen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixchen' cbi chosyone'e zan ni'a cate' za' yesagüe'?

³ Nach Jesúsen' gože' legaue':

—Na' le'e ¿bixchen' chbejyichjle cbi chonle can' ža Diosen' cheyala' goncho san chonxen costumbr chelen'? ⁴ Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyala' gate'." ⁵ Perw le'e žale guaue ye' to bene' xaxne'e: "Bibi de gona' gaclena' le'e, le yogo' da' de chia' ba bnežjuan' lo na' Dios." ⁶ Na' žale bich bi cheyala' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xoxxta'ole ca'. ⁷ Le'e nacle bene' gwxiye'. Chonle cayanen' bzoj da' Isaíasen' chele, gan' žan:

⁸ Bene' qui chesonxene' neda' len diža' cho'a, perw bi chesonxene' neda' len lažda'ogaue'.

⁹ Bibi zejen dan' chesonxene' neda', le dan' chososed chosolo'eden' naquen da' chnalaže' benachze.

¹⁰ Nach Jesúsen' bozol güiže' bene' ca' zjanžaguen' cont gosebigue' lagüen' na' gože' legaue':

—Le gwzenag da' nga nia' le'e na' le šejni'i. ¹¹ Bitw nacho dan' che'ej chagw benachen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

¹² Nach gosebiga' bene' ca' zjanaque' Jesúsen' txen lagüen' gose'ene':

—¿Bi goche'edo' be_{ne}' fariseo ca' beseže'e cate' gosende' xtižo'na'?

¹³ Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'lo_l be_{ne}' bi chosozenag che'. Gwžiaye'e legaque' can' choncho cate' chlažo'cho yixe' ca' chesela'ac lo yel. ¹⁴ Jaseye be_{ne}' fariseo ca'. Zjanaque' ca to be_{ne}' lchol be_{ne}' che'nde' cue'e nez yeto be_{ne}' lchol. Nezecho to be_{ne}' lchol bitw gac cue'e nez yeto be_{ne}' lchol, le txen šjasebixe' to lo' yechw.

¹⁵ Nach Pedroa' gože' Jesúsen':

—Bzejni'išque neto' bi zejen can' gwnaon'.

¹⁶ Nach gož Jesúsen' legaque':

—¿Lencze le'e bitw chejni'ile da' quinga ba gwnia'? ¹⁷ ¿Bi nezele yogo' dan' che'ej chagw be_{na}chen' cho'on lo' li'e na' chžin hor cheden? ¹⁸ Perw yogo' diža' dan' chesoe' be_{na}chen' chesechojen lo' yichjlažda'ogüen'. Na' še choe' be_{ne}' diža' mal, len chonen cont bi nac lažda'ogüen' xilaže' len Diosen'. ¹⁹ Le lo' yichjlaždao' be_{na}chen' nan' chchoj yogo' xbab mal cate' žan yesone' da' mal quinga: yesote' be_{ne}', yesata'lene' no'ol bi nac xo'olgaque' o be_{ne}' byo bi nac be_{ne}' chegaque', na' yesone' gwban, yeso'e diža' güenlaže' che lježgaque', na' yeseneye'e che be_{ne}'. ²⁰ Xbab mal ca' chesonen cont bi nac laždao' be_{ne}' xilaže' len Diosen', gague dan' bi chone'e zan ni'a cate' za' gagüe'.

To no'ole bi naque' be_{ne}' Israel chejnilaže' Jesúsen'

(Mr. 7:24-30)

21 Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón. 22 Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'sque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

23 Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' chol güiže' le' zižje cont gacleno'ne'.

24 Nach gož Jesúsen' legaue':

—Diosen' gwsele' neda' cont chaclena' bene' Israel gualaž checho na'ze, le legaue' zjazaca'lebe' ca xila' dao' be zjanacžeje.

25 Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

26 Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

27 Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

28 Nach Jesúsen' gože'ne':

—No'ole, leca chejnlažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

²⁹ Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nis-dao' Galilean'. Nach gosepe' to lo ya'a jasechi'e lo ya'ana'. ³⁰ Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no bene' nxinj ni'e, bene' lchol, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' leaque' xni'a Jesúsen'. Na' Jesúsen' beyone' yogüe'. ³¹ Na' leca besyebane bene' ca' cate' besele'ede' can' besyene bene' ca' bi gosac yesene, na' besyeyac bene' bi zja-zoa ni'a na'gaque', na' besyeda bene' nxinj ni'e, na' besele'e bene' lchol ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

³² Gwde na' Jesúsen' goxe' bene' ca' zjanaque' le' txen na' gože' leaque':

—Cheyaše'da' bene' qui, le ba goc šone ža zjanite' nga len neda', na' bibi de da' yesagüe'. Na' bi cha-claža' yosa'ane' sin cbi yesagüe' cont bi yesecholde' chanez.

³³ Nach leaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' bene' quinga?

³⁴ Nach gož Jesúsen' leaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to chopga bel ya'a dao'.

³⁵ Nach Jesúsen' bene' mandadw yesebe' bene' zan ca' lo yon'. ³⁶ Na' gwxi'e yetextil ca' gaže na' len bel ya'a dao' ca', nach be'e yela' choxclen

che Diosen', nach bzoxjen' bnežjuen' bene' ca' zjanaque' le' txen na' leaque' bosonežjue' che yogo' bene' nita' na'. ³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. ³⁸ Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. ³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba

(Mr. 8:11-13; Lc. 12:54-56)

¹ Na' goquen' bal' bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. ² Nach Jesúsen' gože' leaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” ³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chache'ele bi zejen da' ca' chon Diosen' tiemp nga zoacho na'a. ⁴ Le'e zoale na'a nacchgualle bene' laždao' xi'a na' ba gwlejyichjle Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'.

Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura
(Mr. 8:14-21)

⁵ Na' cate' besežine' yešla'a nisdao' Galilean', bene' ca' zjanaque' Jesúsen' txen gosache'ede' gosanlaže' yetextil da' yesagüe'. ⁶ Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e?

⁹ ¿Bina' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebał žome pedas yetextil botoble dan' becho'onen? ¹⁰ Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen? ¹¹ ¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach bene' ca' zjanaque' Jesúsen' txen gosache'ede' gague be'e diža' che levadura dan' chosočhine' par chcha'o yetextilen' san be'e

dižan' ca' cont bi yosozenague' che dan' chososed chosolo'e beṇe' fariseo ca' na' beṇe' saduceo ca'.

Pedroa' gwe' Jesúsē' naque' beṇe' gwsela' Diosen' cont nabi'e

(Mr. 8:27-30; Lc. 9:18-21)

¹³ Nach Jesúsē' len beṇe' ca' zjanaque' le' txen besežine' gaḷa'ze to ciuda dan' nzi' Cesarea de Filipo. Nach Jesúsē' gože' beṇe' ca' gosa'aclene' le':

—Diosen' gwsele' neda' golja' beṇaḥ. Perw žbi chesena beṇe'? žnon' naca' neda'? žBi chesene'?

¹⁴ Na' gose'ene':

—Bale' chesene' naco' da' Juan ben' bzoa beṇe' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' da' Jeremías o yeto beṇe' be' xtiža' Diosen' cani'te.

¹⁵ Nach gože' legaque':

—žChixe le'e'? žNo žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocaṇe.

¹⁷ Nach Jesúsē' gože'ne':

—Simón xi'in Jonás, mbalaz zo' dan' gwnao' ca'. Notno beṇaḥ bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. ¹⁸ Na' neda' žia', len' lio' Pedro na' zeje dižan' yej. Na' ca to beṇe' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' beṇe' nechw yotobo' beṇe' yesonxene' neda'. Na' bitwbi gac yeson da' xigüe' ca' yosolej yosošožen beṇe' ca' yesonxene' neda'. ¹⁹ Na' gona' lo nao' zgua'tec le' go'o xtižan' len beṇe' zan cont yosozenague' che Dios ben' zoa yaban' na' nabi'e

yichjlažda'ogaque'. Na' lecze naquen lo nao' yo'o be_{ne}' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰ Nach Jesúsen' gože' lega_{que}' nono yese'e še naque' Cristo ben' gwlej Diosen' cont nabi'e.

Jesúsen' gwdixjue'ede' gate'

(Mr. 8:31-9:1; Lc. 9:22-27)

²¹ Na' žana' Jesúsen' gwzolaküe' bzejni'ide' be_{ne}' ca' zjanaque' le' txen cheya_{la}' šeje' Jerusalén_{na}'. Na' gože' lega_{que}' be_{ne}' gole blao ca' chesenabi'e nación chechon', na' bxoz gwnabia' ca' na' be_{ne}' ca' chososed chosolo'ede' dan' bzoj da' Moisés yoso_{chi} yososaque' le' na' yesote' le'. Perw yeyon ža yebane' ladjo be_{ne}' guat ca'. ²² Nach Pedroa' gwche'e Jesúsen' gan' nac lchojiže na' gwzolaküe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac chio' ca dan' žo' nga.

²³ Perw Jesúsen' gwyechje' gwne'e Pedroa' gože'ne':

—jGwcuas ca'ale Satanás! Chgo'oyelo' neda' bi gona' can' nžia bia' Diosen' gona'. Bi nsa'o xbab che Dios, san nsa'o xbab che be_{na}ch.

²⁴ Gwde na' Jesúsen' gože' be_{ne}' ca' zjanaque' le' txen:

—Note'teze be_{ne}' še chaclaže' gaque' neda' txen, cheya_{la}' cuejyichj cuine' la'czla' žaglagüe' na' con gone' can' nia' neda'. ²⁵ Note'teze be_{ne}' chacde' gone' cont bi žaglagüe' o cont nono yesot le', be_{nan}' cuiayi'. Na' note'teze be_{ne}' chzanlaže' cuine' žaglagüe' o gate' ne chia' neda', ba de yela' mban

che' toli tocanē. ²⁶ ¿Bixe zejennā' to bene' nabi'e doxen yežlion' na' cuiaye'e bi gata' yela' mban che' toli tocanē? Le bi zoa nacle gon benāchen' chixjue' cont gata' yela' mban che' toli tocanē. ²⁷ Diosen' gwsele' neda' golja' benāch na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to benāchen' nite' mbalaz o yesezaca'zi'e neche da' goson to toe'. ²⁸ Na' da' li žia' le'e, balē nita'le nga na'a biṇa' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsele' Diosen' golja' benāch.

17

Jesúsen' goque' ca to be'ni'
(Mr. 9:2-13; Lc. 9:28-36)

¹ Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'. ² Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. ³ Na' concze besele'ede' da' Moisésen' len da' Elíasen' na' chosošalje' len Jesúsen'. ⁴ Nach Pedroa' gože' Jesúsen':

—¡Xanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

⁵ Ne' choe'te Pedron' dižan' ca' cate' to bejw da' chactiten gwyechjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaque-laže'chgüeda' che'. Le gwzenag che'.

⁶ Na' cate' bene' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'.

⁷ Nach gwbiga' Jesúsen' gwxoā ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyechis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsela' Diosen' golja' benach, cana'ch güe'le diža' chen.

¹⁰ Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzōa can' cheyala' yide' da' yoble cate' za'yedenabia' ben' sela' Diosen'. ¿Bixchen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Elíasen' na' yey-onšagüe' yogo'lol. ¹² Perw žia' le'e, Elías ba bide' na' bi gosache'e bene' še nac le'. Na' gosonde' le' con ca gosaclače'. Na' ca'czen' yosoči yososaque' neda' naca' ben' gwsela' Diosen' golja' benach.

¹³ Nach bene' ca' zja'aque' len Jesúsen' gosache'ede' cho'e diža' che da' Juan ben' bzoe' bene' nis.

Beyon Jesúsen' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe'na' gože'ne':

15 —Xana', beyaše'laže'sca xi'ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo'be' lo nis.

16 Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

17 Nach Jesúsen' gože' bene' ca' že'na':

—¡Le'e bene' bi chejnilaže', chonchguale clele! ¿Batca' zelao na'lagua' le'e? Bedesan bidaon' ni.

18 Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

19 Na' gwde goc ca', bene' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixchen' bi goc neto' yebejto' da' xigüen'?

20 Jesúsen' gože' legaque':

—Bitw goc yebejlen dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'lne', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen. 21 Na' cont yebejle da' xigüe' ca' dan' zjanac ca dan' bebeja' yichjlaždao' bidao'na', cheyała' gwyo gwchejle gonle gwbas na' zoatezle yol güizle Diosen'.

Da' yoble Jesúsen' gwdixjue'ede' gate'

(Mr. 9:30-32; Lc. 9:43-45)

22 Na' šlac zjajda Jesúsen' len bene' ca' zjanaque' le' txen do gan' mbane distritw Galilea, Jesúsen' gože' legaque':

—Diosen' gwsele' neda' golja' benach, na' yosodie' neda' lo na' bene' chesegue'ede'nda',
²³ na' yesote'nda'. Perw na' yeyon ža yosban Diosen' neda' ladjo bene' guat ca'.

Nach bene' ca' zjanaque' Jesús'en' txen cate' gosende' xtiže'na' gosacyaše'chgüede'.

Jesús'en' gwdixjue' da' chosočhixjue' che yodao'

²⁴ Na' cate' besyežine' Capernaum, bene' ca' chosočhixjue' che gastw che yodao' blao che chio' bene' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyalā' chixjue' che yodaon'?

²⁵ Nach gož Pedroa' legaue':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesús'en' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosočhixjue'? ¿bene' gualaž che' o še bene' zito'?

²⁶ Nach Pedroa' gože'ne':

—Chosočhixjue' bene' zito'.

Nach Jesús'en' gože' le':

—Bene' zjanaque' biše' lježe' bitwbi chesey-ixjue'. Na' chio' naccho xi'in Dios ben' zoa yaba chnabi'e, bitw cheyalā' chixjwcho che yodaon'.

²⁷ Perw cont nono yeson xbab chgue'echo yodao' blaon', na' chixjwcho. Gwey cho'a nisaon', na' bzala' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

18

Gosacyož be_{ne}' ca' zjanaque' Jesúsen' txen noe' nacch blao

(Mr. 9:33-37; Lc. 9:46-48)

¹ Nachen' be_{ne}' ca' zjanaque' Jesúsen' txen gose-bigue' cuite'na', na' gose'ene':

—¿No neto' gacchto' blao cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol' legaque'. ³ Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabia' Diosen' ben' zoa yaban' yichjlažda'ole. ⁴ Na' note'teze be_{ne}' še yeyaque' ca bidao' nga na' gwzexjwlaže' lao Diosen', nach gaque' be_{ne}' blao len neda' cate' Diosen' ben' zoa yaba gone' cont solao nabi'a. ⁵ Note'teze be_{ne}' chone' güen len to bidao' ca bi' nga neche da' chejnilaže' neda', choncze' güen len neda'.

Bitw cheyala' goncho cont gon be_{ne}' da' xinj

(Mr. 9:42-48; Lc. 17:1-2)

⁶ Note'teze be_{ne}' chon cont lažo' to be_{ne}' za' gwzolağüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clal ca da' gone' cont lažo' be_{ne}' yoble gone' da' xinjen'. ⁷ Nyaše'chguaze gac che benachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' be_{ne}' yesone' da' xinj, perw nyaše'chguaze gac che be_{ne}' chon cont lažo' be_{ne}' yoble gone' da' xinjen'.

⁸ 'Na' da' li žia' le'e, še ni'a na'len' chonen cont gonle da' xinj, cheyala' cuejyichjle da' malen' chonle. Yejni'a bibi ni'a na'len' soa clél ca gonle da' xinjen' len len. Na' yejni'a šjayzoale len Diosen' toli tocané bi zoa šla'a taca'len' o nchog šla'a ni'alen' clél ca yeyejle lo yi' gabil nya' cuerp chelen'.
⁹ Na' še yejlaolen' chonen cont gonle da' xinjen', cheyala' cuejyichjle da' malen' chonle. Yejni'a bibi yejlaolen' cuia clél ca gonle da' xinjen' len len. Na' yejni'a šjayzoale len Diosen' toli tocané zoa šla'aze yejlaole clél ca yežinle lo yi' gabil žia chop la'a yejlaolen'.

Jempl che xila' be gocžeje

(Lc. 15:3-7)

¹⁰ 'Bi gonle note'teze bene' chejnilaže' neda' ca bene' bibi zaca'tec, la'czla' bitec zaque' len benačh. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'.
¹¹ Na' ca naca' neda', Diosen' gwsele' neda' golja' benačh cont gwnežjua' yela' mban toli tocané che bene' ba zjambiayi'.

¹² '¿Bixe chonle xbab? Še nita' to gayoa xila' chele na' yexjw toba' ¿bi yocua'anle be ca' yetaplalj togalj do lo ya'a na'ze na' šjaydiljwle ben' bexjua'?

¹³ Na' da' li žia' le'e, cate' yeželeleba' yebechle dan' beželban' clél ca can' chebele che be ca' taplalj togalj ben' bi gosacžeje.
¹⁴ Ca'czen' naquen len bene' ca' chesejnilaže' neda' bene' ca' bitec bi zjazaque' len benačhen'. Xacho Diosen' ben' zoa yaban' bitw che'nde' cuiayi' ne toe'.

Cheyala'yezi'xencho che bene' lježcho bene' chesejnilaže' Diosen'

(Lc. 17:3)

15 'Še to be_{ne}' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble.

16 Perw še bi gwzenague' diža' dan' šje'elenlenen', güench che'ele yeto o yechope be_{ne}' lježle cont yesaque' testigw ba gota'yoele ben' yoša' xbab chen'. 17 Na' še bitwcze gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len be_{ne}' ca' bi chesejnlaže' Diosen', ca no be_{ne}' güechixjw be_{ne}' chesonchgüa da' xinj.

18 'Da' li žia' le'e, naquen lo na'le ye'le be_{ne}' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

19 'Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. 20 Na' gan' nžag chope šonle chonxenle neda', zoacza' txen len le'e.

21 Nach Pedroa' gwbigue' gože' Jesúsen':

—Xana', še be_{ne}' lježa' chone' da' mal contr neda', ěbal ni'a cheya_{la}' yezi'xena' che'? ězelao do gaž ni'a?

22 Nach Jesúsen' gože'ne':

—Žia' le', gague cheya_{la}' yezi'xen che lježle zelao do gaž ni'a, san yogo'te ni'a cheya_{la}' yezi'xen che lježle.

Jempl che ben' bi bezi'xene' che dan' chalā' bene' lježe'

²³ Na' yelā' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesalā' xmose' ca' xmechue'. Na' goclaže' yebeje' cuent len legaque'. ²⁴ Na' cate' gwzolagüe' bezi'e cuent che to toe', da' nechw bžin to xmose' ben' chalā' zan millón. ²⁵ Na' mosen' bitwbi xmechue' gota' par yonežjuen'. Da'nan' bene' gwnabian' bene' mandadw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' chalē' chen'. ²⁶ Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yelā' chxenlaže' len neda', na' yeyona' doxen dan' chalā' chion'." ²⁷ Nach bene' gwnabian' beyaše'de' le' na' bezi'xene' che doxen dan' chalē' na' bsane' le'. ²⁸ Perw na' cate' bechoj mosen' liž xanen', la' bežagtie' yeto mos lježe' bene' chalā' late' xmechue'. Nach la' gwnizte' yene' gože'ne': "Yeyono' dan' chalō' chian' netec na'a." ²⁹ Nach mos lježen' la' bzoate' xibe' lagüen', gože'ne': "Gwdapešca yelā' chxenlaže' chia' na' yeyona' doxen dan' chalā' chion'." ³⁰ Perw na' mos nechon' bitw bzenague' che mos lježen'. La' gwyejte' jene' mandadw goseyixjue'ne' ližya na' bi yechoje' še bina' yonežjue' dan' chalē' chen'. ³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'lol can' goca'. ³² Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' chio' doxen dan' chalō' chian' dan' gota'yoedo' neda' yezi'xena' chion'." ³³ ¿Bixchen'

bi beyaše'do' mos lježo' ben' chale' chion' can' beyaše'da' le'?" ³⁴ Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še biṇa' yeyixjue' doxen dan' chale' chen'.

³⁵ Nach Jesúsen' gože' bene' ca' zjanaque' le' txen: —Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

19

Bi cheyaḷa' yela'acho len no'ol chechon' cont soa-lencho no'ole yoble

(Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwḷague' yegw Jordánna' beyeje' gan' mbane distritw Judean'. ² Na' bene' zan ja'aclen le', na' beyone' bene' ca' chesacšene.

³ Na' baḷ bene' fariseo ja'aque' gan' zoe'na', le gosacḷaže' yesebeje'ne' diža' da' yosočhine' cont gosožie'ne' xya chol, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' chen'?

⁴ Nach gože' leḡaque':

—¿Biṇa' gwḷable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. ⁵ Na' gwna Diosen': "Da'nan' bene' byon' gwsane' xaxṇe'e cont soalene' no'ole chen' na' chope' yesaque' ca toz bene'." ⁶ Na' ca' bich yesac chope' san toze'. Da'nan' bi cheyaḷa' yesyele'e, le Diosen' ba bcode' leḡaque'.

⁷ Nach gose'ene':

—Še naquen ca' ¿bixčhen' ben da' Moisésen' mandadw cate' to beñe' yele'e len no'ol čhen' cheyała' čhas to yiš da' gwnežjue' no'ol čhen' ga güen' diža' besyele'ena'?

⁸ Jesús en' gože' legaue':

—Da' Moisésen' be'e latje yela'ale len no'ol čhele lagüe dan' nacle beñe' güedenag len Diosen'. Perw cate' Diosen' bene' beñe' nechw ca' bitw nacho goclaže' yesyele'e. ⁹ Žia' le'e, note'teze beñe' chele'e len no'ol čhe' na' cheque'e no'ole yoble, len neztede' no'ol čhen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol čhe beñe' yoble. Na' note'teze beñe' yošagna'lene' to no'ole beñe' bela'a len beñe' čhe', lecze tozcie ca da' xinj gone' ca nac da' chon beñe' chata'lene' no'ol čhe beñe' yoble.

¹⁰ Nach beñe' ca' zjanaque' Jesús en' txen gose'ene':

—Še can' naquen čhe beñe' byo na' no'ole, güench nono gwšagna'.

¹¹ Jesús en' gože' legaue':

—Gague yogo' beñe' yesejni'ide' da' nga, šinze beñe' ca' ba bzejni'i Diosen' legaue' bi zejen. ¹² Nita' beñe' bi žan yosošagne'e dan' gosajje' bi zjanya' cuerp čhe', na' lecze nita' beñe' bi chosošagne'e lagüe dan' gosone beñe' legaue' cont bi zjanya' cuerp čhegaue'. Na' lecze ca' nita' beñe' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag čhe dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'
(Mr. 10:13-16; Lc. 18:15-17)

¹³ Na' ja'ac be_{ne}' jasesane' bidao' lao Jesúsen' cont x_{oa} ne'e yichjgacbe' na' nabe' lao Diosen' gaclene' legacbe'. Perw be_{ne}' ca' zjanaque' le' txen gosedi_{le}' be_{ne}' ca' zjanche'ebe'. ¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžon_{le}, le be_{ne}' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyož gw_xoa na' Jesúsen' yichjgacbe' gw_nabe' lao Diosen' gaclene'be', nach gwyeye' ga yoble.

Be_{ne}' güego' be_{ne}' goc be_{ne}' gw_ni'a
(Mr. 10:17-31; Lc. 18:18-30)

¹⁶ Na' goquen', to be_{ne}' güego' bžine' gan' zoa Jesúsen', na' gože'ne':

—Maestrw, le' naco' be_{ne}' güen. ¿Bi da' güen cheya_{la}' gona' cont gata' yela' mban chia' to_{li} to-
 cane?

¹⁷ Nach Jesúsen' gože'ne':

—¿Bixchen' žo' naca' be_{ne}' güen? Toz be_{ne}' güen zoa, na' len' naque' Dios. Perw na' še chaclažo' gata' yela' mban chio' to_{li} tocan_e, cheya_{la}' gono' can' non Diosen' mandadw goncho.

¹⁸ Nach gože' Jesúsen':

—¿Bica' da' ca'?

Nach Jesúsen' gože' le':

—Nono gotle, bi gata'len_{le} no'ol bi nac no'ol che_{le} o be_{ne}' byo be_{ne}' bi nac be_{ne}' che_{le}, bi cuan_{le}, bitw güe'le diža' güenlaže' che be_{ne}' lježle.

19 Le gap bala'an xaxna'le, na' le gaque lježle can' chaque cuinle.

20 Nach bene' güegon' gože' Jesúsen':

—Yogo'lol da' quinga gwzolagua' chonczan' cate' ne' nactia' bidao'. ¿Bixe dan' chyažjech gona'?

21 Jesúsen' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

22 Perw na' bene' güegon' cate' beyož bende' diža' can' gož Jesúsen' le', beza'yaše', le bene' gwni'achgua goque'.

23 Gwde na' Jesúsen' gože' bene' ca' zjanaque' le' txen:

—Da' li žia' le'e, leca zdebe naquen to bene' gwni'a gwzenague' che Dios ben' zoa yaba cont Diosen' nabi'e yichjlažda'ogüe'. 24 Da' yoble žia' le'e, bedao'ch te to be xen be nzi' camello to lo' nag yeše' cllel ca to bene' gwni'a gwzenague' che Dios cont Diosen' nabi'e yichjlažda'ogüe'.

25 Na' bene' ca' zjanaque' Jesúsen' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

26 Jesúsen' gwne'e legaque', nach gože'ne':

—Bibi de da' gac yeson benačen' cont šjasyenite' len Diosen', perw bi zoa da' nacho da' bi gac gon Dios.

27 Nach Pedroa' gože' Jesúsen':

—Neto' ba gwlejyichjto' yogo' da' de cheto' cont nacto' le' txen. ¿Bi da' güen gata' cheto' dan' ba gwlejyichjto' da' ca'?

²⁸ Jesúsen' gože' legaue':

—Da' li žia' le'e, Diosen' gwsele' neda' golja' benach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' nabi'a'le šižinw cuen bene' ca' zjanaque' xi'in diaža che da' Israel.

²⁹ Na' note'teze bene' ba gwlejyichje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocaue. ³⁰ Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

20

Jempl che bene' güen žin ca'

¹ Nach Jesúsen' gože' legaue': —Yela' gwnabia' che Diosen' ben' zoa yaban' zaca'leben ca da' nga goc. To bene' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' bene' güen žin cont yesone' žin yežlio chen' žana'. ² Na' gosexenlaže' bene' güen žin ca' to denario chixue' to toe' con ca chac mosen' tža žin. Nach gwsele' legaue' gan' jasene' žinna'. ³ Na' do cheda ga gozeje' gan' chac ya'an, na' ble'ede' nita'ch bene' bibi žin de yesone'. ⁴ Na' gože' legaue': “Lencze le'e le šja'ac gan' že' yag uvas chian' le šjen žin na' chixjwcza' le'e ca cheyala'.” Nach ja'ac

be_{ne}' ca'. ⁵ Na' da' yoble gwyeje' do guagwbiž
 na' do cheda šone. Bezle'ede' nita'ch be_{ne}' bibi
 žin chesone' nach gwsele' legaue' cont yesone' žin
 gan' že' yag uvas chen'. ⁶ Na' ca do cheda gayo'
 šeže'le gozeje' da' yoble ble'eczde' nita'ch be_{ne}'
 bibi žin chesone'. Na' gože' legaue': "¿Bixchen'
 bi gwyejele žin?" ⁷ Nach gose'ene': "Notno gwne
 neto' šjento' xšine'." Nach goze'e legaue': "Lencze
 le'e le šja'ac le šjen žin gan' že' yag uvas chian'.
 Na' chixjwcza' le'e ca cheyala'." Nach ja'ac be_{ne}'
 ca'. ⁸ Na' cate' bžin hor bosa' xan yag uvasen'
 be_{ne}' güen žin ca', nach gože' mos blao chen':
 "Beyax be_{ne}' güen žin ca' cont chixjo'ne', solao
 chixjo' be_{ne}' ca' besela'ac bzebe, na' yeyožle len
 be_{ne}' ca' besela'ac da' nechw." ⁹ Nach mos blaon'
 zgua'tec gwdixjue' be_{ne}' ca' gosezolagüe' gosone'
 žin cheda gayo' šeže'le tgüeje denario to toe'. ¹⁰ Na'
 cate' gwdixjue' be_{ne}' ca' gosezolagüe' gosone' žin
 šezildao', gosacde' chixjoche' legaue' da' zcha'och
 dan' gosezolagüe' gosone' žin šezildao'. Perw tozcze
 can' gwdixjue' yogo'lolte'. ¹¹ Na' cate' beyož gosezi'
 laxjw be_{ne}' ca' gosezolao žinna' šezildao', gosadoe'
 diža' xan žinna'. ¹² Gose'ene': "Do ža bžaglaochguato'
 lo da' zeye' bento' žin chion'. Na' tozcze can'
 gwdixjo' neto' len be_{ne}' ca' besela' bzebe, len to
 hor güejgan' gosone' žin." ¹³ Perw na' xan žinna'
 gože' toe': "Migw chia', bitwbi da' mal chona'
 len le'. ¿Gague gwxenlažo' to denario chixjua' to
 tole? ¹⁴ Laxjon' ba gwxi'o, guac yeyejo'. Chaclača'
 gwnežjua' be_{ne}' ca' to denario güeje con can' be_{na}'
 le'e la'czla' besela'aque' bzebe. ¹⁵ ¿Bixchen' chxi'o
 neda' neche dan' naca' be_{ne}' šagüe'? Naquen lo na'
 gona' con ca chaclača' len da' de chia'."

¹⁶ Nach Jesúsen' gože' beṇe' ca' bosozenag jem-p len':

—Can' naquen, nita' beṇe' zjanaque' beṇe' bzebe na'a, perw lecze gwžin ža cate' legaque' yesaque' beṇe' žialao. Na' nita' beṇe' zjanaque' beṇe' žialao na'a, perw gwžin ža yesaque' beṇe' bzebe. Diosen' chaxe' yogo'lol beṇe' cont yesejle' che', perw bal guen' chosozenague' che', na' legacze' chbeje' cont chesaque' xi'ine'.

Da' yoble chyixjue'e Jesúsen' gate'

(Mr. 10:32-34; Lc. 18:31-34)

¹⁷ Jesúsen' len yezan beṇe' zja'aque' Jerusalénna'. Na' šlac zjangüe'e nezen' gwlejiže' beṇe' šižinw ca' gwleje' cont zjanaque' txen len le' na' gože' legaque':

¹⁸ —Na'a ba zejcho Jerusalénna' gan' yesone' neda' lo na' bxož gwnabia' ca' na' lo na' beṇe' ca' chososed chosolo'ede' dan' bzoj da' Moisés, na' yesechoglagüen' chia' yesote' neda', neda' naca' ben' gwsela' Dios golja' beṇač. ¹⁹ Na' yesone'nda' lo na' beṇe' bi zjanaque' beṇe' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo beṇe' guat ca'.

Xna' Jacobo na' Juanna' gwnabe' yesebe' xi'ine' ca' cuit Jesúsen' gan' nabi'ena'

(Mr. 10:35-45)

²⁰ Na' ja'ac xi'in Zebedeo, Jacobo len Juan, na' len xna'gaque' lao Jesúsen'. Na' xna'gaquen' bzoa xibe' lao Jesúsen' gože'ne':

—Chṇabda' le' to goclen.

²¹ Nach Jesúsen' gože'ne':

—¿Bi goclen chaclažo' gona'?

Nach xṇa'gaquen' gože'ne':

—Chaclaža' gono' cont xi'ina' quinga yesebi'e
šla'a güeje cuito'na' cate' žin ža ṇabi'o.

²² Jesúsēn' gože' Jacobo na' Juanna':

—Le'e cabi ṇezele bi dan' chṇable. ¿Gwṇhejlaže'le
tele yela' zi' yela' ya' ca dan' tia' neda' na' gac ṇhele
can' gac chia'?

Nach bosyoži'e xtižen' gose'ene':

—Gwṇhejlaže'to'.

²³ Nach Jesúsēn' gože' legaue':

—Da' licze tele yela' zi' yela' ya' ca dan' tia' neda'
na' gac ṇhele can' gac ṇhian', perw bi naquen lo na'
ṇia' non' cue' cuitan' cate' žin ža ṇabi'a, san yesebe'
beṇe' ba mbej Xa' Diosēn' gaquen ṇhe'.

²⁴ Nach cate' yeši beṇe' ca' zjanaue' le' txen
gosende' can' gosena beṇe' ca' chope, beseloque'
legaue'. ²⁵ Nach Jesúsēn' goxe' yogüe' cont gose-
bigue' lagüēn' na' gože' legaue':

—Nezeczele beṇe' gwnabia' ṇhe to to nación na'
beṇe' blao ca' chesone' byen chosozenag beṇe'
ṇhegaue'. ²⁶ Perw bi naquen ca' len le'e. San
note'tezle chaclaže'le gacle beṇe' blao, cheyala'
gwzēxjwlaže'le gaclen beṇe' lježle. ²⁷ Na' še
note'tezle chaclaže'le gacle beṇe' žialao, cheyala'
gon cuinle ca xmos beṇe' lježle. ²⁸ Ca'cze naquen
len neda' naca' ben' gwsela' Diosēn' golja' beṇaṇh.
Gague za'a cont yesaclen beṇe' neda' san za'a cont
gaclena' beṇe', na' chzanlaže' cuina' yesote' neda'
ṇeṇhe xtoła' beṇaṇchen'.

*Jesúsēn' bene' cont chope beṇe' lṇhol besyele'ede'
(Mr. 10:46-52; Lc. 18:35-43)*

29 Nach cate' besyeya'aque' ciuda Jericó, bene' zan zjasenagüe' Jesúsen' len bene' ca' zjanaque' le' txen. 30 Na' chope bene' lchol zjachi' chanez gan' zjayda Jesúsen'. Na' cate' gosacbe'ede' Jesúsen' zej gan' zjachi'ena' nach chososya'adie' gose'e le':

—Xanto', len' naco' xi'in diaža che da' rey Davin'. Beyaše'laže'sca neto'.

31 Nach bene' ca' chesyede gan' zjachi'ena' gosedile' legaque' cont yesenite' šize. Perw na' gosene' zižjech gose'ene':

—Xanto', len' naco' xi'in diaža che da' rey Davin', beyaše'laže'sca neto'!

32 Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

33 Nach gose'ene':

—Xanto', chaclaže'to' yele'eto'.

34 Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

*Gosonxene' Jesúsen' cate' beyo'e Jerusalén
(Mr. 11:1-11; Lc. 19:28-40; Jn. 12:12-19)*

1 Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandadw chope bene' ca' zjanaque' le' txen, 2 gožgaque'ne':

—Le šja'ac yež dan' chi' gala'ze, na' cate' žinlen' na' yeže'lele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga. 3 Na'

še bi ye' be_{ne}' le'e na' ye' lne': "Xanto'na' chyažjde' legacba'." Na' la' yedyesantecze'ba' len le'e.

⁴ Goc yogo' da' qui cont goc can' bzoj to ben' bzoj Xtiža' Diosen' cani', gwe'ne':

⁵ Gož be_{ne}' ca' nita' Jerusalén_{na}':

"Le na'šc, ba za' rey chelen',

žie' cože' to burr dao', xi'in beyix'e' be choa' yoa'.

Ze'e ca to be_{ne}' bi naque' be_{ne}' blao.

⁶ Na' ja'ac be_{ne}' ca' yež dao' dan' gož Jesúsen' legaque' ca', na' gosone' can' ben Jesúsen' mandadw. ⁷ Na' besyeche'e burroa' len xi'inba' lao

Jesúsen' na' gosexoa no xagaque' cože'ban' na' gwžia Jesúsen' be daon' cont gweye' Jerusalén_{na}'.

⁸ Na' be_{ne}' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

⁹ Na' be_{ne}' zjažialao na' lecze be_{ne}' za'ac cože' bososye'e gosene':

—iLeca be_{ne}' zaca' benga nac xi'in diaža che da' rey David! iMbalaz ben' za' nga gwsela' Xancho Diosen' le' cont nabi'e! iLeca be_{ne}' zaca' ben' zoa yaban'!

¹⁰ Na' cate' bžin Jesúsen' Jerusalén_{na}' yogo' be_{ne}' ca' že' ciudan' besyebande', na' gosene':

—iNo benga bla' nga?

¹¹ Na' be_{ne}' ca' nžag Jesúsen' bosyoži'e xtiža'gaque' gosene':

—Bengan' Jesús be_{ne}' za' yež Nazaret gan' mbane distritw Galilea na' cho'e xtiža' Dios.

Jesúsen' bebeje' be_{ne}' ca' cheson ya'a yodao' blaon'

(Mr. 11:15-19; Lc. 19:45-48; Jn. 2:13-22)

¹² Na' Jesúsen' gwyo'e chyo'o yodao' blaon' na' bešaše' yogo' beṇe' ca' chesote' na' beṇe' chesa'o na'. Nach bchixe' xmes beṇe' ca' chosoša' mechw, na' yag ga chesebe' beṇe' ca' chesote' ngolbex.

¹³ Na' gože' legaue':

—Nyojczy Xtiža' Diosen' žan: “Yesene' ližan' naquen to latje gan' yesol güiž beṇe' neda’”, perw le'e chonlen ca to latje ga že' beṇe' gwban.

¹⁴ Na' beṇe' lchoł ca' na' len beṇe' ca' nxinj ni'e gosebigue' lao Jesúsen' šlac zoe' chyo'o yodaon'. Nach beyone' legaue'. ¹⁵ Perw na' bxoz gwn-abia' ca' na' beṇe' ca' chososed chosolo'e dan' bzoj da' Moisésen' leca beseže'e cate' besele'ede' yela' guac ca' dan' ben Jesúsen'. Na' leczy beseže'e cate' gosende' can' bososya'a bi' bixjw ca' chyo'o yodao' blaon', gosenabe': “Leca beṇe' zaca' benga nac xi'in diaža che da' rey David.” ¹⁶ Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' legaue':

—Zenda'. ¿Biṇa' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

¹⁷ Na' bechoje' gan' nita' beṇe' ca' na' beze'e ciudan'. Na' že'na' jayga'aṇe' Betania.

Ben Jesúsen' cont gwbiž yag yixgüigw

(Mr. 11:12-14, 20-26)

¹⁸ Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsen'. ¹⁹ Na' ble'ede' to yag yixgüigw zoan cho'a nezen' na' jaṇe'e še žia

yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'. ²⁰ Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

²¹ Na' Jesúsen' gože' leaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jaso lo' nisdan”, na' gac can' nalen'. ²² Na' še chejnilaže'le Diosen', bite'teze dan' nabelene' cate' yol güžlene', goncen' le'e.

Yela' chnabia' che Jesúsen'

(Mr. 11:27-33; Lc. 20:1-8)

²³ Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bxoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

²⁴ Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendan'. ²⁵ Le našč neda': ¿non' gwsela' da' Juanna' bzoe' bene' nis? ¿Dios nan' gwsele'ne', še benachen'?

Nach legacze' gose' lježe':

—Še ye'chone' Dios gwsela' le', na' ye'e chio': “¿Bixchen' ca gwyejle'le che'?” ²⁶ Na' bi gac ye'chone' benach gwsela' le', le yogo'te bene' že' nga

chesejle'e Diosen' gwsele' da' Juanna' be'e xtiže'na',
na' xož bi yesonde' chio'.

²⁷ Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian'
chonlenda' da' ca'.

Jempl che chope xi'in bene'

²⁸ Na' Jesúsen' gože' legaque':

—Le gon xbab bi zeje jempl nga: Gwzoa to bene'
gwnita' chope xi'ine'. Na' gože' tobe': "Xi'ina',
chaclača' šejo' güen žin na'aža gan' že' yag uvas chia'
ca'." ²⁹ Nach xi'inen' gožbe' le': "Bitw ša'a." Perw
gwdele beyombe' xbab nach gwyejbe'. ³⁰ Nach
gozeje' gan' zoa xi'inen' yeto, na' ježe'be' can' gože'
bi' biše'ben'. Na' la' gožte bin' le': "Guaccze, na' ša'a."
Perw bitw gwyejbe'. ³¹ Gwnašč neda', čno bi' ca'
chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene'
güechixjw ca' na' no'ole ca' chja'aclen note'teze
bene' byo yobech yosozenague' che Diosen' cont
nabi'e yichjlažda'ogaque' clal ca' le'e. ³² Ca' nac
Juanna' ben' bzoe' bene' nis, bide' laolen' na'
gwdixjue'ede' le'e naquen' cheyala' gonle cont
yebe Diosen' le'e. Perw bitw gwyejle'le che'. Na'
bene' güechixjw ca' na' no'ole zle' ca' gosejle'e che'.
Na' cate' gočbe'ele bene' ca' ba gosejle'e che', bitw
betinjele xtola'le ca' cont šejle'le che dan' bsede da'
Juanna'.

Jempl che mos mal ca'
(Mr. 12:1-12: Lc. 20:9-19)

³³ 'Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gwyeje' zito'. ³⁴ Cate' bžin ža yosyotobe' cosešen', gwsele' to chope xmose' gan' že' bene' ca' nac lo na'gaque' yag uvasen' cont šjasyexi'e to tlacw cosešen' dan' cheyal'a si'e. ³⁵ Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosožie'ne' yej, nach yetoe' gosote'ne'. ³⁶ Nach gossela' xan yag uvasen' mos zanch clal ca' bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

³⁷ 'Nach gwdena' xan yežlion' gwsele' cuincze xi'inen', gocde' yesezi'e xtižen'. ³⁸ Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." ³⁹ Nach gosezene'ne', besye-beje'ne' gan' že' yag ca' na' gosote'ne'.

⁴⁰ Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

⁴¹ Nach bosyoži'e xtižen' gosene':

—Šeje' šjetoe' be_{ne}' mal ca', na' yodie' yežlion' lo
na' be_{ne}' yoble be_{ne}' yeson güen yosyonežjue'ne' to
tlacw cosešen' cate' žin ža yosyotoben'.

⁴² Jesúsen' gože' legaue':

—Ca'czen'. ¿Bi_{na}' gwlablę ga nyoj Xtiža' Diosen',
žan quinga?:

Yej dan' bi gosaclačę be_{ne}' güen yo'o ca'
yosočhine',

len ba naquen yej squin.

Da' nga ben Xancho Diosen',

na' naquen to da' yežejecho.

⁴³ Da'nan' žia' le'e, da' bi chzenagle che Diosen',
cuejyichje' le'e na' cueje' be_{ne}' yoble be_{ne}'
yosozenag che' cont nabi'e yichjlačda'ogaue'.

⁴⁴ Na' ca' nac yejen', note'teze be_{ne}' lažo' lo yeja'
na' cue'žošje', na' note'teze be_{ne}' chiže' yeja' cate'
lažon' na' gwšošjen le'.

⁴⁵ Na' b_xoz gwnabia' ca' na' be_{ne}' fariseo
ca', cate' gosende' jempl ca' dan' be' Jesúsen',
gosacbe'ede' be'e diža' che legaue' dan' bi
chesejnilaže' le'. ⁴⁶ Nach gosaclačę yesezene'
le', perw besežebe' bi yesone be_{ne}' ca' nžague'
legaue', le yogüe' gosejle'e gwsela' Diosen' Jesúsen'
cont cho'e xtiže'na'.

22

Jempl che ben' bene' lni cate' bšagna' xi'ine'

¹ Na' da' yoble bsd blo'e Jesúsen' be_{ne}' ca' len
jempl, gozne':

² —Yela' gwnabia' che Diosen' zaca'leben ca' da'
nga goc. Gwzoa to be_{ne}' gwnabia' na' bene' gastw
cate' bšagna' xi'ine'. ³ Na' cate' bžin hor solao l_{ni}'in'

gwsele' xnose' ca' cont jasexi'e bene' ca' ba bol
 güiže' šja'ac lina', perw notno goclaže' šja'ac lni
 chen'. ⁴ Nach gože' yeto xonj xnose' ca': "Le šjež
 bene' ca' ba bol güižan' ye' lne' ba bsini'a dan' gagw-
 chona'. Ba betua' be dao' be chesane' na' ba bsini'a
 dan' gagwcho lo lnin'. Na' ye' lne' yeside' gagwcho
 dan' ba bsini'an'." ⁵ Perw bene' ca' ba gosata'yoede'
 cont šja'aque', bitw gosone' cuent dan' gose' mos ca'
 legaque'. Toe' gwyeje' jane'e yežlio che', na' yetoe'
 gwyeje' jene' negosyw. ⁶ Na' yebale' gosenize' mos
 ca' gwsela' bene' gwnabian' na' gosonde' legaque'
 zi' na' gosote' legaque'. ⁷ Na' leca bža'a bene' gwn-
 abian'. Na' gwsele' soldadw che' ca' jasete' bene'
 ca' gosot xnoson' na' bosozeye' lažgaquen'. ⁸ Nach
 bene' gwnabian' gože' xnoson': "Ba bsini'a dan'
 gagwcho lo lnin', perw bene' ca' ba bol güiža'
 nachia' bitw zjazaque' yeside'. ⁹ Le šja'ac le šjata
 yogo' nez na' ye' le yogo' bene' yežagle yeside' lnin'."
¹⁰ Na' mos ca' ja'aque' yogo' nez na' jasetobe' con
 yogo' bene' besežague', no bene' naque' bene' güen
 na' no bene' naque' bene' mal, cont beža' yo'o gan'
 chac lnin'.

¹¹ 'Perw cate' gwyo'o bene' gwnabian' jane'e
 bene' ca' že'na' na' ble'ede' to bene' bi nyaze'
 lache' da' bnežjue' yesaze' lo lnin'. ¹² Nach gože'
 le': "Migw chia', ĩnac goquen' gwyo'o nga bitw
 nyazo' lache' dan' bena' chazo'?" Nach bena' bitw
 beželde' bi ye'ene'. ¹³ Nach bene' gwnabian' bene'
 mandadw yosochej xnose' ca' ni'a na' bena' cont
 yesyebeje'ne' na' yesebeque'ne' gan' nac chol, ga
 cuežyaše' na' gan' gagwxejte laye' tantw žaglagüe'.
¹⁴ Can' naquen, Diosen' chaxe' yogo' bene' cont
 yesejle'e che', perw bal guen' chosozenague' che'

na' legacze' chbeje' cont yesaque' xi'ine'.

Ca nac dan' cheyala' gaxjw

(Mr. 12:13-17; Lc. 20:20-26)

¹⁵ Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'. ¹⁶ Na' bene' fariseo ca' gosesele' bal bene' zjanaque' txen len legaque' na' yebal bene' chesone' txen len Herodesen' cont jaseže' Jesúsen':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'. ¹⁷ Da'nan' zedenabeto' le' cont nao' neto' can' chacdo' cheyala' gonto'. ¿Naquen binlo no chixjw da' cheyala' chixjwcho lao ben' nac la'zelagüe bene' gwnabia' ben' chi' Roma, še bi?

¹⁸ Jesúsen' gocbe'ede' yela' xi'a čhegaquen', nach gože' legaque':

—¡Nacle bene' gwxiye'! ¿Bixchen' chaclaže'le yoslažo'le neda' len xtižan'? ¹⁹ Le gwlo'e neda' to mechw dan' chyixjwle čhe gobiernen'.

Nach goso'ene' to mechw dan' nzi' denario.

²⁰ Nach Jesúsen' gože' legaque':

—¿No lao dan' da' le'e mechw nga? na' ¿no la da' nyoj le'en ni?

²¹ Nach gose'ene':

—Čhe César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaque':

—Le gwnežjo bene' gwnabian' da' nac čhe bene' gwnabia', na' le gwnežjo Dios da' nac čhe Dios.

²² Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

Cate' yesyeban bene' guat ca'

(Mr. 12:18-27; Lc. 20:27-40)

²³ Na' lo ža na'teze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁴ —Maestrw, da Moisésen' gwne': “Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyala' yošagna'lene' no'ol güezeba' cont yesenita' xi'in diaža che da' bišen'.

²⁵ Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'. ²⁶ Na' lecze gote' nono xi'ine' gwnita'. Lecz ca' goc len bene' gwyona', bžinten bene' gaža' yogo'lole' gosac che' ca'. ²⁷ Na' gwde gosat yogo'lol bene' ca', nach got len no'ola'. ²⁸ Na' cate' yesyebane' ladjo bene' guat ca', žnox bene' ca' soalene' no'ola' ca' xo'ole'?, le yoguen' bosyošagna'lene' le'.

²⁹ Na' gož Jesúsen' legaque':

—Clemen' chonle xbab dan' žale ca', le bi nezele can' ža Xtiža' Dios dan' nyojen, neca nombia'le yela' guac chen'. ³⁰ Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjazoa yaba. ³¹ Na' ca' nac dan' yesyeban bene' guat ca', žbina' gwlable da' nga can' nyoj Xtiža' Diosen'? žan: ³² “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

³³ Na' bene' ca' zjanžaguen' besyebande' cate' gosende' diža' dan' bsed blo'ede' legaque'.

Dan' nac da' blaoch dan' ža Diosen' cheyała' goncho

(Mr. 12:28-34)

³⁴ Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'. ³⁵ Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwčhine' contr le', gože'ne':

³⁶ —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyała' goncho?

³⁷ Nach gož Jesúsen' le':

—“Cheyała' gaquecho Xancho Diosen' con ca zelao chejni'icho do yichj do laže'cho.” ³⁸ Lenña' naquen da' žialaoch na' da' blaoch lagüe da' ca' ža Diosen' cheyała' goncho. ³⁹ Na' da' gwchopen' zegalán' ca', žan: “Cheyała' gaque lježcho ca chaque cuincho.” ⁴⁰ Čhope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

⁴¹ Na' šlac ne' zjanžag bene' fariseo ca', ⁴² Jesúsen' gože' legaque':

—¿Bixe xbab chonle che Criston' ben' gwlej Diosen' cont yedenabi'e? ¿No xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' legaque':

—Še ca' naquen, ¿bixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen, na' gona' cont yogo' no chesegue'e le' yosozexjw yichje' yosozenague' chio'.”

⁴⁵ ¿Nacxe gac nacho Criston' xi'in diaža che da' rey David? le' cuin Davin' gože' le': “Xana”.

⁴⁶ Na' notoch no goc yosyoži'e xtižen'. Na' gwzolao žana' notoch no besyeyaxje bi yeseñabde' Jesúsén'.

23

Xtola' bene' fariseo ca' na' bene' ca' chososed chosolo'e leyna'

(Mr. 12:38-40; Lc. 11:37-54; 20:45-47)

¹ Nach Jesúsén' gwzolao be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

² —Bene' ca' chososed chosolo'e ley na' bene' fariseo ca' ba zjanlane' xlatje da' Moisésén' cont chosozejni'ide' bene' ley che Diosen'. ³ Na' da'nan' cheyała' gwzenagle chegaque' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyała' gac. ⁴ Legaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en legaque'. ⁵ Ca nac bene' ca', yogo' dan' chesonen', chesonen' ga yesele'e bene' can' chesonen'

contze yesonxene' legaque'. Chio' bene' Israel nchejcho caj dao' de yid do na'cho na' do loxga-cho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' lecze chesone' lox xagaque' da' tonech clel ca che bene' yezica'chle. ⁶ Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. ⁷ Chesyebede' chesap bene' legaque' bala'an cate' chesyežague' lagüe ya'a. Na' chesyebede' yese' bene' legaque' maestrw.

⁸ 'Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnlaže'le neda' nac biše' lježle tole yetole. ⁹ Na' lecze bitw gonxenle note'teze bene' blao ye'lnē: "Xato". Toze Diosen' ben' zoa yaba naque' Xacho. ¹⁰ Na' bitw güe'le latje ye' bene' le'e: "Xana", le toz neda' Cristo naca' Xanle. ¹¹ Še no le'e nacle bene' blaoch, cheyala' gwzexjw yichjle gaclen lježle. ¹² Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gaxcene'.

¹³ 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

¹⁴ 'iNyaše'chguaze gac che le'e chsed chlo'ele ley

dan' bzoj da' Moisésen' na' le'e be_{ne}' fariseo! Chziye'le no no'ole güezebe cont checa'ale yo'o chegaque'. Na' cate' cho_l güižle Diosen', sša choe'le diža' cont yesaque be_{ne}' leca chonxen_lne'. Gacchle castigw cl_{el} ca yezica'chle be_{ne}' güen da' xinj.

¹⁵ 'iNyaše'chguaze gac che le'e chsed chlo'ele ley dan' bzoj da' Moisésen' na' le'e be_{ne}' fariseo! iNacle be_{ne}' gwxiye'! Chejtez chejle chjatiljwle be_{ne}' zito' be_{ne}' yeson txen len dan' chsed chlo'elen'. Na' cate' chželelene' chzejni'ilne' cont yesaque' be_{ne}' xi'ach cl_{el} ca le'e.

¹⁶ 'iNyaše'chguaze gac che le'e! iNacle ca be_{ne}' l_{ch}ol be_{ne}' chesacde' guac yesegüe'e nez be_{ne}' yoble! Žale note'teze be_{ne}' še ne': "Yodao' blaon' zoan testigw chia' gona' can' ba gwnia", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia", nach cheya_{la}' gone' can' gwnen'. ¹⁷ iLe'e nacle ca to be_{ne}' l_{ch}ol na' bitw chejni'ile! Oron' bitec bi zacan'. Yodao'na' gan' yo'o oron' len_{na}' zaca'chen, le dan' yo'o oron' lo'en_{na}' da'nan' oron' naquen che Dios. ¹⁸ Na' lecze žale še to be_{ne}' že': "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia", bitwbi zejen xtižen'. Perw na' še že': "Dan' xoa lo' mes lo' yodaon' zoan testigw chia' gona' can' ba gwnia", nachen' cheya_{la}' gone' can' gwnen'. ¹⁹ iLe'e nacle ca be_{ne}' l_{ch}ol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' che-se_xoe' dan' chosonežjue' Diosen', len_{na}' zaca'chen, le naquen che Dios. ²⁰ Še be_{ne}' že': "Mes dan' zoa lo' yodaon' zoan testigw chia' gona' can' ba gwnia",

lencze dan' xoa lo mesen' zoan testigw che'. ²¹ Na' še bene' že': "Yodaon' zoan testigw chia' gona' can' ba gwnia'", lecze zejen Diosen' naque' testigw che', le yodaon' naquen che Dios na' nan' zoe'. ²² Na' še bene' že': "Yaban' zoan testigw chia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

²³ 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyala' gonle da' nac güen lao Diosen', na' cheyala' yeyaše'laže' ljež benachle na' cheyala' gonle can' ba gwlo'o cho'ale gonle. Da' ca' zjanaquen da' zejechen gonle, perw lecze bitw cheyala' cuejyichjle bi gwnežjwle da' ca' chnežjwle Diosen'. ²⁴ iNacle ca to bene' lchol bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyala' goncho, na' bi chonle da' ca' zjazaca'chguan.

²⁵ 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'alén. ²⁶ iLe'e bene' fariseo, nchol yichjlažda'olen! Le yetinje xtola'le cont da' licze

gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

²⁷ 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban. ²⁸ Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

²⁹ 'iNyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! iNacle bene' gwxiye'! Chonšagüe'le cho'a ba che da' bene' gosoe xtiža' Diosen' cani', na' chonšagüe'le cho'a ba che yezica'chle bene' goson da' güen. ³⁰ Na' žale: "Šaca' chio' ba zoacho ca tiemp che da' xoxxta'ocho ca', bitw bencho txen len legaue' cate' gosote' bene' ca' gosoe xtiža' Diosen' cani'." ³¹ Perw na' yogo'lolte dan' chonle chlo'en tozcze can' nacle len da' xoxxta'ole ca' bene' gosot da' bene' ca' gosoe xtiža' Diosen' cani'. ³² Le gwza'laošaze le gon bica'ch da' zgot dan' bitw gola' yeson da' xoxxta'ole ca'.

³³ 'Le'e nacchgualle bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'. ³⁴ Na' da' gona', neda' sela' no bene' yesoe xtiža'na' len le'e na' no bene' sina' na' nochle bene' yososedde' le'e xtižan'. Na' gotle bale' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'. ³⁵ Na' dan' gonle ca' gaple dola' che yela' got che yogo' bene' ca' goson da' güen, ben' gosot da' xoxxta'ole ca' gwzolaozen

len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonx-ene' Diosen'. ³⁶ Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xoxxta'ole ca'.

*Begüine' Jesúsen' che xtolá' bene' Jerusalén
(Lc. 13:34-35)*

³⁷ Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le. ³⁸ Na' na'a ba gwlejšyichj Diosen' le'e. ³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: “Mbalaz ben' za nga nselá' Xancho Diosen' le' nabi'e”.

24

*Gwžin ža yosyochinje' yodao' blaon'
(Mr. 13:1-2; Lc. 21:5-6)*

¹ Na' ba cheza' Jesúsen' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' goso'e diža' catec xdan nac yodaon' na' lecze ca' yo'o ca' zjanyechjen.

² Nach Jesúsen' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyochinje'.

*Dan' gac cate' ba za' bagwze yeyož yežlio nga
(Mr. 13:3-23; Lc. 21:7-24; 17:22-24)*

³ Na' ja'aque' Ya'a Olivos. Na' cate' Jesúsen' ba chi'e lo ya'an, bene' ca' zjanaque' le' txen gose-bigue' lagüen' gose'ene' šižize:

—Che'neto' nao' neto' batcan' gac da' ca'. Na' ħnac gac nezeto' cate' ba zoa bagwze yido' na' ba zoa yeyož yežlion'?

⁴ Nach Jesúsen' boži'e xtiža'gaquen' gwne':

—Le gwsaca' cont notno siye' le'e. ⁵ Le zan bene' yesaš yežlio nga bene' yesaclaže' yosolane' xlatja' nga. Na' yesene': “Nedan' Cristo ben' gwlej Diosen' cont nabi'e.” Na' yeseziye'e bene' zan. ⁶ Na' yenele chac gwdile nile nale, na' yenele guac gwdile, perw bi žeble, le can' cheyala' gac. Perw gague lenna' nacho ba bžin ža yeyož yežlion'. ⁷ Le yesedil to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'. ⁸ Perw na' yogo' da' qui gac cate' za' solao gata' yela' zi'.

⁹ 'Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. ¹⁰ Cana' bene' zan bene' ba chesejni-laže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'. ¹¹ Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. ¹² Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'. ¹³ Perw na' note'tezle gwyo gwchejlaže'le cont bi cue-jyichje' dan' chejnilaže'le neda' žinten gatle, nach šjayzoale len Diosen'. ¹⁴ Na' šja'ac bene' doxen lo

yežlion' yeseyixjue'ede' diža' güen cont yeseneze
benachen' cheyalā' yosozenague' che Diosen' nach
nabi'e yichjlažda'ogaque'. Na' cate' bene' že' yogo'
nación ba zjaņezde' da'na', cana'ch yeyož yežlion'.

15-16 'Da' Daniel ben' gwdixjue'ede' xtiža' Dios
cani' bzoje' che da' zbanchgua da' gwxiņjen latje
gan' chonxencho Diosen'. Na' cate' le'e le'ele ba
zoa dan' gan' zoa yodao' blao, cana' bene' yesenita'
distritw Judea cheyalā' yosoxonje' šja'aque' do
ya'adao'. (Bene' gwlaben' cheyalā' šejni'iden'.)
17 Na' bene' chda do yichjo'o che ližen', bi yeyetje'
yotobe' xšinlaze' že' ližen', con yoxonje'. 18 Na'
bene' chda yixe' bi yeyej liže' šjayxi'e xalane'.
19 ¡Nyaše'chguaze zjanac no'ol ca' zjanoa' xi'in na'
no'ol ca' ne' chosoguaže' bidao' lo ža ca'! 20 Na' le
nab lao Dios bi yažjen gwxiņjle cate' chac zag o
lo ža che Dios. 21 Le yesaquen ža da' leca yesale'
bene'. Cate' gwxete yežlion' na' ža na'aža nono
na' gale' ca', neca žinlažen' yesale'de' ca' da' yoble.
22 Na' šaca' Xancho Diosen' bi yozaše' žan' yesac ca',
notno yela, perw yozašen' neche chacde' bene' ca'
chesejnilaže' le', bene' ba gwleje' zjanaque' xi'ine'.

23 'Cana' še no ye' le'e: "Le na'šč, nga zoa Criston'
ben' gwlej Diosen' cont nabi'e", o "Le na'šč, na'
zoe", ne ca'cze bi šejle'le. 24 Yesaš bene' gwxiye'
bene' yesaclaže' yosolane' xlatja' nga, na' yeson
cuine' ca' bene' chesoe' xtiža' Dios. Na' yesone'
yela' guac da' yesele'e bene' na' bichle da' zaca'
yesyebande' cont yeseziye'e legaque'. Na' len bene'
ca' ba gwlej Diosen' zjanaque' xi'ine' yesaclaže'
bene' gwxiye' ca' yeseziye'e šaca' gac yeseziye'e
legaque'. 25 Ba nezele can' gac, le ba gwdixjue'eda'

le'e yogo' can' gac. ²⁶ Na' še yese'e le'e: "Zoa Criston' latje dašen'", bitw gwzenagle čhegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le čhegaque'. ²⁷ Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwselē' neda' golja' benāch. Yida' zejzenez na' yogo'lol beñe' yesele'ede' neda'. ²⁸ Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble
(Mr. 13:24-37; Lc. 21:25-33; 17:26-30, 34-36)

²⁹ 'Na' cate' la' yeyožte saca'zi' benāchen', gw-bižen' yeyaquen chol, na' bion' bich gwsenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ³⁰ Na' cana'ch beñe' že' yežlion' yesele'ede' neda' naca' ben' gwsela' Diosen' golja' benāch za'a ladjo bejon' len yela' guac xen na' yela' beñe' zaca' juisyw chia'. Na' beñe' že' yogo' nación che yežlion' yesebežyaše', beñe' bi gosejni-laže' neda'. ³¹ Na' caten' yida', to trompeta' cuežen zižje, na' sela' angl chia' ca' doxen yežlion' yosy-otobe' beñe' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

³² 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'en dao', chache'ele bach zoa yela' tiemp yejon'. ³³ Na' lecze cate' le'ele ba chac da' mal ca' ba gw-nian', cana'ch nezele ba za' juisyw, ba zoa gala'. ³⁴ Da' li žia' le'e, bina' yenit diaža che le'e nita'le na'a cate' ba goc yogo'lol da' ca'. ³⁵ 'Le'e yaba na' yežlion'

yesede chen, perw ca nac xtižan', gague da' te chi gac can' žanna'.

³⁶ 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi neza'. Toz Xa' Dios neze.

³⁷ 'Diosen' gwsele' neda' golja' benach, na' can' goc tiemp che da' Noé, lecze can' gac caten' neda' yida' da' yoble. ³⁸ Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. ³⁹ Bitw gosache'ede' bin' gac. Cate'ch goc yejw sio' juisyw na' bia' nisen' yogo'lole' cana'ch gosache'ede'. Lecz can' gac, con cate'ch yida' da' yoble cana'chen' yesache'e bene' bin' gac. ⁴⁰ Quingan' gac caten' yida' da' yoble: Chope bene' nite' do yixe', toe' yezi' yeca'a, na' yetoe' yocua'ana'. ⁴¹ Na' chope no'ole nite' chesote', toe' yezi' yeca'a na' yetoe' yocua'ana'.

⁴² 'Da'nan' le soa le cueze, le bi nezele bi ža bi horen' yida' da' yoble, neda' naca' Xanle. ⁴³ Le gon xbab che da' nga, šaca' neze xan yo'on' do bi hor lo yelen' žin bene' gwbanña' ližen', na'ze' cont bitw güe'e latje šo' ben' ližen' cuane' xšinlazen'. ⁴⁴ Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' benach.

*Mos ben' chon güen, na' mos ben' bi chon güen
(Lc. 12:41-48)*

⁴⁵ 'Note'tezle še zoale lez bate'teze, zaca'leble ca to mos bene' naque' bene' sina' na' bene' chon da' cheyała' gone'. Na' še to bene' mos chonchgüe'

güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. ⁴⁶ Še to beņe' mosen' chonteze' can' gož xanen' le', mbalaz soe' cate' yežin xanen'. ⁴⁷ Da' li žia le'e, xanen' cue' lo na' mosen' yogo'lo da' de che'. ⁴⁸ Perw še mosen' naque' beņe' zgot na' gone' xbab ne': "Ba gwže xanan'". ⁴⁹ Nach solagüe' tile' mos ca' yezica'chle na' ye'ej gagwxate' len no beņe' borrašw, ⁵⁰ nach xane'na' yežine' to ža senyale' le' to hor bi nache'ede'. ⁵¹ Na' dan' bi chon mosen' ca cheyała' gone', xane'na' chinchgüe' le' ca gatte'. Gac che' can' chac che note'teze beņe' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglagüe'.

25

Jempl che ši no'ole güego' ja'aque' to yela' güešagna'

¹ Nach Jesúsen' goze'e beņe' ca' zjanaque' le' txen:

—Cheyała' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che beņe' ca' chosošagnan'. Na' zjanxobe' lintern chegaque' ja'aque' jaseleze' yesyechoj beņe' ca' liž no'olen' par šja'aque' liž beņe' byon' txen. ² Na' gayo' no'ol ca' gosaque' beņe' chejni'i na' yegayoe' bibi xbab gosone'. ³ Cate' no'ol ca' bibi xbab goson gosa'ac liže', zjanxobe' lintern chegaquen', perw bitw gosoxe' botey gan' yože set dan' yosočhine' cate' yebiž dan' yože lo' lintern chegaquen'. ⁴ Na' no'ol ca'

chesejni'i, zjanxobe' lintern chęgaque' lente botey seten' dan' yosočhine' cate' yebiž dan' yože lo' lintern chęgaquen'. ⁵ Na' beņe' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'. ⁶ Na' do chel, to beņe' gwņe' zižje, gože' legaque': "Ba chesyechoj beņe' güešagnan'. Le šo'o šjašagchone'." ⁷ Na' cate' gože' legaque' ca', yogo' no'ol ca' gosezeche' na' gosečogue' mešw dan' gwyey che lintern' na' bosyogualen' da' yoble. ⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž cheton'." ⁹ Nach no'ol ca' gose'e legaque': "Bitw gac gonto' late' chele, le dan' de cheton' bitw gaquen par yogo'cho. San le šja'ac le šjaxi' chelen' ga choten'." ¹⁰ Nach no'ol ca' bi goson xbab ja'aque' jasexi'e seta'. Na' šlac zja'aque' besyežin beņe' ca' chosošagna' liž beņe' byon'. Na' no'ol ca' gosaque' beņe' chejni'i, goso'e txen len beņe' ca' chosošagnan' lo' yo'o gan' chesone' lnin'. Nach mos ca' bososeyjue' puerten'. ¹¹ Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Beņe', gwsaljwšca puerta' cont šo'to'." ¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesúsen' beņe' ca' zjanaque' le' txen: —Ca'czen' cheyala' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwsela' Diosen' golja' beņach.

Jempl che ben' bocua'anlene' xmose' ca' mechon'

¹⁴ 'Na' dan' yida' yežlio nga da' yoble yedenabi'a zaca'leben ca da' nga goc. To beņe' gwyeje' nación

zito'. Na' za' se'e goxe' mos che' ca' na' gwlo'e lo
 na'gaque' xmechue' cont gosone' delgens. ¹⁵ Toe'
 bocua'anlene' gayo' mil. Na' yetoe' bocua'anlene'
 chop mil. Na' yetoe' bocua'anlene' to mil. Bnežjue'
 legaque' con ca ble'ede' da' chac yeson to toe'. Be-
 yož bene' ca' na' gwze'e. ¹⁶ Na' ben' bocua'anlene'
 gayo' mil la' gwzolaote chone' delgens len mechon'
 na' bene' gan lecze gayo' mil. ¹⁷ Lecze ca' ben ben'
 bocua'anlene' chope mil, na' bene' gan yechope
 mil. ¹⁸ Na' ben' bnežjue' to mil gwyeje' jacuaše'
 xmechw xanen' to lo' yechw da' gwche'ene' lo' yo.

¹⁹ 'Goc šsa gwza' xan mos ca' cate' bežine', nach
 bene' mandadw ja'ac xmose' ca' lagüen' cont bosy-
 odie' cuent. ²⁰ Mosen' ben' bocua'anlene' gayo'
 mil bžine' lagüen' na' gože'ne': "Xana', ni de da'
 gayo' mil dan' beno' neda'. Na' ba bena' gan
 yegayo' mil." ²¹ Na' xane'na' gože'ne': "Ba beno'
 da' güen. Naco' mos güen na' ba beno' ca cheyala'
 gono'. Na' dan' beno' can' cheyala' gonon' len
 da' daon' bocua'anlena' len', da'nan' gona' lo nao'
 da' xench. Gwyo'o cont so' mbalaz len neda'."
²² Nach cate' bžin ben' bocua'anlene' chope mil,
 bena' gože'ne': "Xana', ni de da' chope mil dan'
 bocua'anleno' neda', na' ba bena' gan yechope
 mil." ²³ Nach gož xanen' le': "Ba beno' da' güen.
 Naco' mos güen na' ba beno' ca cheyala' gono'.
 Na' dan' beno' can' cheyala' gonon' len da' daon'
 bocua'anlena' le', da'nan' gona' lo nao' da' xench.
 Gwyo'o cont so' mbalaz len neda'." ²⁴ Nach
 cate' bezžin ben' bocua'anlene' to mil, nach gože'
 xane'na': "Nga de xmecho' dan' bocua'anleno'
 neda'. Nezda' naco' to bene' znia. Chelapo' da'

gosaz be_{ne}' yoble, na' chotobo' coseš ga goson be_{ne}' yoble žin. ²⁵ Da'nan' gwy'a jačhe'ena' to yechw na' bcuaša' xmechon', le bžeba' še gwnitan'. Na' na'a bezi'scan'." ²⁶ Nach xanen' gože' le': "jNaco' mos mal, na' naco' xagüed! Nezdo' chelapa' ga gosaz be_{ne}' yoble, na' chotoba' coseš ga goson be_{ne}' yoble žin. ²⁷ Na' lagüe da' nezdo' chona' ca' ħbixčhen' bi gwlejo' xmechuan' be_{ne}' yoble cont yezi'an len yichjen na'a ba bela'a?" ²⁸ Nach gože' xmose' ca' yezica'chle: "Yeca'ale mechon' dan' bocua'anlena' beng na' gwnežjwlen ben' ba noxe' ši mil. ²⁹ Can' naquen, note'teze be_{ne}' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze be_{ne}' bi chgone' žin dan' chnežjo xanen' le', yeca'a xanen' da' daon' noxe'na'. ³⁰ Na' ca nac mos xagüed nga, le yebeje' le che'exoxje' gan' nac choł na' cuežyaše' na' gagwxejte laye' dan' leca žaglagüe'."

Can' gac cate' Jesúsen' gone' yela' justis che yogo' nación

³¹ 'Diosen' gwsele' neda' golja' be_{ne}ačh, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba. ³² Na' yapa' yogo' be_{ne}' che yogo' nación ca' yeside' laguan'. Na' cate' ba nita' yogüe' na' la'ane' can' chon to be_{ne}' güeye xila' cate' chebeje' partle xila' ca' na' partle šib ca'. ³³ Na' be_{ne}' ca' zjanac be_{ne}' güen lao Diosen' dan' ba gosejnilaže' neda', gwnita' legaque' cuitan' šla'a licha. Perw be_{ne}' mal ca', gwnita' legaque' cuitan' šla'a robes. ³⁴ Na' neda'

naca' rey yapa' beṇe' ca' nita' šla'a lichan': "Ba ben Xa' Diosen' cont le'e soale mbalaz. Le da nga cont gona' ṇabia'le txen len neda' can' ba nžia bia' Diosen' cate' gwxete yežlio. ³⁵ Gona' cont ṇabia'cho txen, le cate' gwdona' le'e beṇle dan' gwdagua'. Na' cate' gwbiḷda' nis, le'e beṇle da' güe'ēja'. Na' cate' goca' ca beṇe' zito' le'e bleble neda' ližlen'. ³⁶ Na' cate' bi gota' da' čhaza', le'e beṇle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." ³⁷ Na' beṇe' güen ca' yese'e neda': "Xanto', čbaten' ble'eto' le' gwdono' na' beṇto' da' gwdago'? Na' čbaten' gwbiḷdo' na' beṇto' da' güe'ėjo'? ³⁸ Na' čbaten' goco' ca beṇe' zito' na' blebto' le'? Na' čbaten' ble'eto' le' bi de da' čhazo' na' beṇto' da' gwyazo'? ³⁹ Na' čbaten' gocšendo' o goto' ližya na' bedena'to' le'?" ⁴⁰ Na' neda' naca' rey yape'gaca'ne': "Da' li žia' le'e, beṇe' ca' chesejnilaže' neda' zjanaque' ca biša' na' ca zana'. Na' yogo' ni'a cate' beyaše'laže'le legaque', la'czla' bitec bi zjazaque' len beṇačhen', lencze nedan' beyaše'laže'le."

⁴¹ 'Nach beṇe' ca' nita' šla'a robesle, beṇe' mal ca', yape'gaca'ne': "Le cuas ca'ale. Ba žia bia' čhele cuiayi'le yela' güen da' mal čhelen'. Le šja'ac lo yi' gabiḷ dan' bi cheyol, yi' dan' bxen Diosen' cont saca'zi' Satanás toḷi tocanē len da' xigüe' ca' cheson xšinen. ⁴² Le šja'ac lo yi' gabiḷen', le cate' gwdona' bitw beṇle dan' gagua'. Cate' gwbiḷda' bitw beṇle da' ye'ēja'. ⁴³ Cate' goca' ca beṇe' zito' bitw bleble neda' ližle. Cate' bi gota' da' čhaza' bitw beṇle da' čhaza'. Cate' gocšenda' na' cate' gota' ližya, bitw bedena'le neda'." ⁴⁴ Nach legaque' lecze yosyoži'e

xtižan' yesene': "Xanto', ĵbaten' bi beyaše'to' le' cate' gwdono' o gwbiłdo', o goco' bene' zito', o bi gota' da' chazo', o gocšendo', o goto' ližyan'?" ⁴⁵ Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le bene' ca' chesejnilaže' neda', la'cze bibi zjazaque' len benačhen', da'nan' lencze nedan' bi beyaše'laže'le." ⁴⁶ Nach bene' mal ca' yesezaca'zi'e toli tocaņe. Perw bene' ca' chesone' güen lao Diosen' yesezoe' mbalaz toli tocaņe.

26

Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' bene' ca' gwleje' cont zjanaque' txen len le':

² —Ba nezele yečhope žazen' gala' lni pascw chechon'. Na' cana' gaca' lo na' bene' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwsela' Diosen' golja' benačh.

³ Nach bxoz gwnabia' ca' na' bene' ca' chososed chosolo'e dan' bzoj da' Moisésen' na' bene' gole blao ca' chesenabi'e nación Israel chechon' besedobe' chyo'o liž bxoz blao ben' le Caifás. ⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. ⁵ Na' gosene':

—Bi senchone' lo lnin' cont ca yesebec bene' žaš.

To no'ole bzoe' set zix yichj Jesúsen'

(Mr. 14:3-9; Jn. 12:1-8)

⁶ Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra. ⁷ Na' šlac chi' Jesúsen'

cho'a mesen', bžin to no'ole noxe' to de yejese ga chož set da' chla' zix da' leca chzaca' la'ay. Na' no'olen' bzoachochje' seten' yichj Jesúsen'. ⁸ Na' bene' ca' zjanaque' txen len Jesúsen' cate' be-sele'ede' can' ben no'olen' beseže'e na' gosene':

—¿Bixchen' con benditjde' set zix nga? ⁹ Ša no bete' len, yesonen mechw xen na' yosonežjue' gacenen bene' yaše'.

¹⁰ Jesúsen' gocbe'ede' bin' gosene' nach gože' legaue':

—¿Bixchen' chnele che no'olen'? Dan' bene' len neda' nga naquen güen. ¹¹ Le bene' yaše' ca' bate'teze nita'cze' len le'e, san nedan' bich soa' yessa len le'e. ¹² Dan' bguazje'nda' set zixen' bene' dan' cheyalā' yesone' len neda' cate' gaša'. ¹³ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jane'e bxoz gwn-abia' ca'. ¹⁵ Na' ježe' legaue':

—¿Gaca'te' gonle neda' cont gwdia' Jesúsen' lo na'le?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. ¹⁶ Nach cana' Judasen' gwzolagüe' gwdiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaue' can' yesone' šjasyeza'laže' yela' got chen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' lni caten' chesagüe' yetextil dan' bibi levadura yo'o, na' ža nechw che lnin' beŋe' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' che pascon'?

¹⁸ Nach Jesúsen' gože' legaue':

—Le'e šja'ac ciudan' gan' zoa to beŋe' byo ben' nombia'cho na' ye'lnē': “Maestron' že' ba zoa žin ža gac da' cheyala' gac che', na' ližo' nga che'nde' gagwlento'ne' xše' lni pascon'.”

¹⁹ Nach beŋe' ca' gosone' can' gož Jesúsen' legaue', jasesini'e xše' že' lnina'.

²⁰ Na' cate' beyož gwxxa gwbiž, Jesúsen' len beŋe' šižinw ca' gwleje' cont zjanaque' le' txen gosebi'e cho'a mesen' gosagüe'. ²¹ Na' šlac chesagüen' gož Jesúsen' legaue':

—Da' li žia' le'e, to le'e gwdele neda' lo na' beŋe' ca' chesegue'e neda'.

²² Nach legaue' besyeyaše'laže'de', nach gosezo-lagüe' tgüjeje' tgüjeje' gosenabde' le' gose'ene':

—Xana', ¿nedan' gona' ca'?

²³ Nach gože' legaue':

—To ben' chagw len neda' txen toz lo' ye'en, le' gwdie' neda' lo na' beŋe' ca'. ²⁴ Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' beŋach, perw nyaše'chguaze nac ben' gwdie' neda' lo na' beŋe' ca'. Yejni'acle ša bi golje'.

25 Nach Judasen' ben' za' gwdie' Jesúsen' lo' na' be_{ne}' ca' gože'ne':

—Maestrw, ¿nedan' gwdia' le' lo' na' be_{ne}' ca'?

Jesúsen' gože'ne':

—Le len'.

26 Na' šlac chesagüen', Jesúsen' gwxi'e to yetex-tilen' na' beyož be'e yela' cho_xc_{len} che Dios, bzox-jen' na' bnežjuen' be_{ne}' ca' zjanaque' le' txen, gože' le_{gaque}':

—Le gagon'. Lenna' cuerp chian'.

27 Nach be_{xue}' to vas gan' yože nis uvasen', na' beyož be'e yela' cho_xc_{len} che Dios boznežjuen' le_{gaque}', goze'ene':

—Yogo'le, le ye'ej late' güeje dan' yože lo' vas nga. 28 Da' nga xchena' na' chzanlažan' laljen neche xto_{la}' yogo'lo_l be_{na}ch. Na' laljen cont solao gac da' cob dan' gwna Diosen' gone' gaclene' be_{na}chen'.

29 Chnia' le'e, bich ye'eja' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ejan' da' yoble.

*Jesúsen' gwne' Pedroa' bi chebe' še nombi'e le'
(Mr. 14:26-31; Lc. 22:31-34; Jn. 13:36-38)*

30 Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. 31 Na' šlac zjangüe'e nezen' Jesúsen' gože' le_{gaque}':

—Na'aže' yogo'le cuejyichjle neda' neche dan' gac chian'. Le nyojczen le'e Xtiža' Diosen' žan: "Gota' be_{ne}' güeye' xilan' na' xila' ca' yesaslasba'."

32 Perw na' cate' yosban Diosen' neda' ladjo be_{ne}' guat ca', yobch yeya'a Galilea ca' le'e.

33 Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

³⁴ Jesús'en' gože' le':

—Da' li žia' le', bina' cuež jean' na'aže' cate' gac šon ni'a bi chchebo' še nombi'o neda'.

³⁵ Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesús'en' txen gosene' ca'.

Jesús'en' bol güiže' Diosen' to latje dan' nzi' Getsemaní

(Mr. 14:32-42; Lc. 22:39-46)

³⁶ Nach besežine' latje gan' nzi' Getsemaní, na' Jesús'en' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

³⁷ Na' gwche'e Pedroa' len chop xi'in Zebedeo, Jacobon' len Juanna'. Na' Jesús'en' gwzolao go-cyaše'chgüede', na' benchgüe' xbab. ³⁸ Nach gože' legaque':

—Lo' yichjlažda'oguan' chacyaše'chgüeda', chacda' con gatcza' catequen' chžaglagua'. Nga le yega'an bi tasle, le na' txen len neda'.

³⁹ Nach Jesús'en' gwžialagüe' yelate' na' jačhaze' lo yon' coscho'ale nach bol güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

⁴⁰ Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca goc cuejle bišgal len neda'?

⁴¹ Bi tasle na' le yol güiž Dios cont bi gon gwxiyen'

le'e gan'. Ne₂zda' che'nele na'zle len neda' perw bi chzoele.

⁴² Na' gosze'e gan' nite' na' da' yoble ja₂l güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal. ⁴⁴ Na' gwze'e da' yoble gan' nite'na' ja₂l güiže' Diosen' da' gwyone ni'a, na' goznacze' da' yoble can' ba gwnen'. ⁴⁵ Na' bezžine' gan' nita' bene' ca' šone nach gože' legaque':

—Na'ach gua₂que tasle na' yezi'laže'le. Ba gole gwde to bene' neda' lo na' bene' güen da' xin₂ ca', neda' naca' ben' gwse₂la' Diosen' golja' bena₂ch. ⁴⁶ Le čhas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' bene' chesegue'ede' le' (Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsen' dižan' ca' cate' bžin Judas ben' goque' txen len bene' šižinw ca' gwlej Jesúsen' cont zjanaque' le' txen. Na' zan bene' zja'ac len le' zjanoxe' no yag, no spada, bene' gosesela' b₂xoz gwnabia' ca' na' bene' gole blao ca' chesenabi'e nación Israel chechon'. ⁴⁸ Na' Judas ben' bdie' le' lo na' bene' ca', gože' legaque' nac yesene₂zde' non' yesezene', gwne':

—Ben' gwnopa' xague', le'na' Jesús. Le sene'.

⁴⁹ Nach la' gwbiga'te' cuit Jesúsen', gože'ne':

—Patiox, Maestrw.

Na' bnope'ne'. ⁵⁰ Jesúsen' gože'ne':

—Migw čhia', čbixchen' zao' nga?

Nach la' gosebiga'te be_{ne}' ca' gosezene' Jesúsen' na' goseche'ene'.

⁵¹ Na' to ben' nac txen len Jesúsen' gwleje' spada chen' na' gwdinen' mos che b_xoz blaon' gwchogte' šla'a nague_n'. ⁵² Nach Jesúsen' gože'ne':

—Bego'o spada chion' lo' liženna', le yogo' be_{ne}' chesote' be_{ne}' len spada, lecze len chesatlene'. ⁵³ ¿Bi ne_zdo' guac nabda' Xan' cont la' sela'te' angl zan juisyw be_{ne}' yesaclene' neda'? ⁵⁴ Perw še gona' ca' ¿nacxe gac dan' cheya_la' gac dan' nyoj Xtiža' Diosen' žan quinga gaquen'?

⁵⁵ Nach Jesúsen' gože' be_{ne}' ca' zjasezen le':

—¿Bixchen' non_{le} neda' ca to be_{ne}' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsd blo'eda' be_{ne}' že'na' na' bi gwzen_{le} neda'. ⁵⁶ Perw chac da' qui cont chac can' ža Xtiža' Diosen' dan' bosozoj da' be_{ne}' goso'e xtižen' cani'.

Nach yogo' be_{ne}' ca' zjanaque' Jesúsen' txen bosoxnje' gosebejyichje'ne'.

Goseche'e Jesúsen' lao be_{ne}' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' be_{ne}' ca' gosezen Jesúsen' goseche'ene' lao Caifás ben' nac b_xoz blao, gan' ba zjanžag be_{ne}' ca' chososed chosolo'e dan' bzoj da' Moisésen' na' len be_{ne}' gole blao ca' chesenabi'e nación chechon'.

⁵⁸ Nach Pedroa' na'ogüe' Jesúsen' zito' zito'le bžinte' liž b_xoz blaon', na' gwyo'e chyo'ona' gwchi'e len be_{ne}' ca' chesape' yodao' blaon', le goclaže' le'ede' naquen' zelao gac che Jesúsen'.

⁵⁹ Nach yogo' bꝛoz gwnabia' ca' na' yezica'chle bene' gole blao ca' chesenabi'e naci^on chechon' cheseyiljwlaže' bi diža' güenlaže' yeso'e che Jesúsen' cont yesote'ne'. ⁶⁰ Perw goc sša bitw besyeželde' bi diža' güenlaže' yosode'ede' le' cont gosožie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yechope bene' na' bedilen can' gosenen'. ⁶¹ Quinga gosene':

—Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

⁶² Nach gwzoža' bꝛoz blaon' gože' Jesúsen':

—¿Bibi de bi nao' ca' nac da' nga chosocuiš bene' quinga le'?

⁶³ Bitwbi gwna Jesúsen'. Nach gož bꝛoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli tocanē cue'e da' bali še ledō' can' žon'.

⁶⁴ Jesúsen' gože'ne':

—Le can' žale nan' naca'. Diosen' gwsele' neda' golja' benach. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene bꝛoz blaon' xtiža' Jesúsen', gwšo' gwcheza'te xen', le par le' da' mal juisyon' gwna Jesúsen' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'.

⁶⁶ ¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca Dios.

⁶⁷ Nach bosoži'e xene' cho'alao Jesús'en', na' gose-baže'ne', na' bale' gosegape' xague'na'. ⁶⁸ Nach gose'ene':

—Še len' naco' Criston', gwñeya'ašč, gwna neto', ħnon' chgapa' le'?

Pedroa' bi gwchebe' še nombi'e Jesús'en'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že' na', Pedroa' bitw gwchebe' še naque' txen len Jesús'en', na' gože' no'olen':

—Bi ñezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinña' le', na' goze'e bene' ca' že'na':

—Lecze len beng a naque' txen len Jesús bene' Nazareten'.

⁷² Da' yoble bitw gwchebe' še naque' txen len Jesús'en', nach gwne':

—Na' zoa Diosen' cue'e da' baļi bitw nombi'a bena' žo' ca'.

⁷³ Na' goccze šlož, gosebiga' bene' ca' že'na' goseze'e Pedroa':

—Da' licze, naco' txen len legaue', le nacia' chñio' can' chesene bene' Galilea ca'.

⁷⁴ Nach Pedroa' chop šone ñi'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea. ⁷⁵ Nach jayze'e Pedroa' can' gož Jesús'en' le': “Biña' cuež jean' cate' gac šone

ni'a bi chchebo' še nombi'o neda'." Nach beze'e leca gwchežyaše'.

27

Goseche'e Jesúsen' lao Pilaton'
(Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b̥xoz gwnabia' ca' na' beṇe' gole blao ca' chesenabia' nación chechon' besyedobe' na' gosechoglagüen' yesote' Jesúsen'.
² Nach bosocheje'ne' na' goseche'ene' jasesane'ne' lo na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo na' beṇe' ca', cate' goche'ede' ba gosechoglagüen' yesote' Jesúsen', betinjde' dan' bdie' le' lo na' b̥xoz gwnabia' ca' na' beṇe' gole blao ca'. Nach gwyeye' laogaquen' par bonežjue' legaque' šichoa mechw platan'.
⁴ Nach gože' legaque':

—Malen' bena' bdia' lo na'len' to beṇe' bi nape' dola'.

Na' gose'ene':

—Bitwbi dola' nap neto' dan' beno' ca'.

⁵ Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

⁶ Beyož beza' Judasen', b̥xoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to beṇe'.

⁷ Na' bosoxi'e yesezi'e len mechon' to yežlio dan' de che to beṇe' güen yeso'. Na' gosezi'en par to cap-santw ga yosocuaše' beṇe' zito'. ⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'. ⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: “Besyezi'e šichoa mechw platan', dan' gosena beṇe' Israel zaca' bena'. ¹⁰ Na' gosezi'e yežlio che to beṇe' güen yeso', can' gwna Xancho Diosen' neda'.”

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseche'e Jesúsen' lao gobernadoren' na' šlac zeche' lagüen', gobernadoren' gože'ne':

—¿Len' naco' rey che beṇe' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' bxož gwnabia' ca' na' beṇe' gole blao ca' chesenabia' nación chechon' bosocuiše' Jesúsen', bitw bi gwne'. ¹³ Nach Pilaton' gože'ne':

—¿Bi chendo' catec da' zan xya nga chesagüe' chio'?

¹⁴ Perw Jesúsen' ne to xtiže'na' bitw boži'e, na' bebanechgüe gobernadoren'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadoren' gwsane' to beṇe' de ližya cate' čala' lni pascw checho, con beṇe' yesenab beṇe' gualaž chechon'. ¹⁶ Na' ližya na' de to beṇe' chzechgua che' naque' beṇe' güen da' xinj, na' le' Barrabás. ¹⁷ Nach Pilaton' gože' beṇe' ca' zjanžaguen':

—¿Noe' bene' quinga chaclaže'le gwsana'?
¿Gwsana' Barrabás še Jesús nga ben' chesene'
naque' Cristo ben' gwlej Diosen' cont yedenabi'e?

¹⁸ Gocbe'e Pilaton' dan' chesacxi'a b̥xoz gwn-
abia' ca' Jesúsen', da'nan' bosodie' le' lo ne'en.

¹⁹ Ca' chi' Pilaton' gan' chone' yela' justisen',
cate' b̥žin to rson da' gwsela' no'ol chen', gože'ne':
“Bitw bi gondo' bena', le bibi dola' nape'. Nže'e
gwneda'ne' yel na' b̥žaglaochgua' neche dan' chac
che bena'.”

²⁰ Na' b̥xoz gwnabia' ca' na' bene' gole blao ca'
chesenabi'e nación chechon' gosego'oyele' bene'
ca' že'na' cont yesenabe' gwsane' Barrabásen' na'
yesenabe' yesote' Jesúsen'. ²¹ Nach gobernadoren'
gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—¿Bixe gona' len Jesús nga ben' chesene' naque'
Cristo ben' gwlej Diosen' cont yedenabi'e?

Na' yogüe' gose'ene':

—¡Bde'e le'e yag cruz!

²³ Nach gož gobernadoren' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—¡Bde'e le'e yag cruz!

²⁴ Gocbe'e Pilaton' bicze bi gac gone'. Ba
chyla'ch chesone' žaš juisyw. Nach gwsele' to
bene' jaxi'e nis cont bone'e lao bene' ca' že'na' na'
gože' legaque':

—Bibi da' xinj non benga. Bitw naquen xbagā'
dan' gotlene', xbagā' le'e naquen še ba betwlene'.

25 Nach yogo' bene' ca' gose'ene':

—Xbaga' neto' na' xbag'a xi'into' naquen che yela' got che benga.

26 Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsén', nach bene' le' lo na'gaque' cont yosode'ene' le'e yag cruzén'.

27 Nach soldadw che gobernadoren' goseche'e Jesúsén' lo' yo'o che gobernadoren', nach bosyotobe' yogo' soldadw ca'. 28 Na' goseyine' xalana' Jesúsén' na' bosoguacue'ne' to lache' xna ca dan' chesaz rey ca'. 29 Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüen' par gosonle' che', nach gose'ene':

—¡Viva rey che bene' Israel!

30 Nach bosoži'ene' xene', na' besyeque'e xis dan' noxen' na' bosozeten' yichje'. 31 Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzén'.

Bosode'e Jesúsén' le'e yag cruzén'

(Mr. 15:21-32; Lc. 23:26-43; Jn. 19:17-27)

32 Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsén'.

33 Na' besežine' to latje gan' nzi' Gólgota, zeje diža' latje che žit yichj bene' guat. 34 Na' bosonežjue' Jesúsén' vino da' nchixe to da' zla' par ye'ejen', perw le' con bnixen', bitw güe'ejen'.

35 Na' cate' beyož bosode'ene' le'e yag cruzén', soldadw ca' gosone' rifa cate' besyele'e xalane' cont

gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' che che', yesonen' rifa." ³⁶ Nach gosebi'e gosape'ne'. ³⁷ Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

³⁸ Na' lecze cana' bosode'e chope bene' gwban le'e yechope yag cruz. Toe' gwda' cuit Jesúsen' licha na' yetoe' cuite' robes. ³⁹ Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le', ⁴⁰ gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

⁴¹ Na' len bxoz gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación chechon', yogüe' gosezi'diže'ne' na' gosene':

⁴² —¡Yezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'. ⁴³ Le' chejnilaže' Diosen', le gwne': "Dogualje Xi'in Dios neda'." ¡Na' le'echo yosla Diosen' le' na'a še chacde' le'!

⁴⁴ Na' bene' gwban ca' zjada' le'e yag cruzen' chop la'a cuiten', lecze gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

⁴⁵ Na' do guagwbiž doxen yežlion' goc choľ bžinte cheda šone. ⁴⁶ Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejiychjo' neda'?)

47 Na' baḷ bene' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiža' Diosen' cani'.

48 Nach la' bchojte to bene' gwyajsese' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'.

49 Na' yebale' gose'e bena':

—Cuezcho, yešc še güide Elíasen' yosle'ne'.

50 Nach da' yoble Jesúsen' bosye'e zižje na' gote'.

51 Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'eḷe. Na' gwxo'chgua gosoxjte yej ca'. 52 Na' ľecze besyaljo ba che bene' ba gosat. Na' zan da' bene' ca' gosejnilaže' Diosen' besyebane' ladjo bene' guat ca'. 53 Nach caten' ba beban Jesúsen' ladjo bene' guat ca', besyechoje' lo' ba čhegaquen' na' jaya'aque' jaselo'elagüe' ciuda Jerusalén. Na' zan bene' besele'ede' legaque'.

54 Na' ca nac xan soldadw ca' na' bene' ca' nche'e, bene' nita' chesape' Jesúsen', cate' besele'ede' can' gwxo' na' bichle da' ca' goc, besežebchgüe', na' gosene':

—Da' li le benga goc dogualje Xi'in Dios.

55 Na' ľecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' ľe' len bi da' chyažjde'. 56 Na' len no'ol ca' María bene' Magdala, na' ľecze María ben' nac xna' Jacobo na' José, na' ľecze ca' xna' Jacobo na' Juan, xi'in Zebedeo.

*Bosocuaše' Jesúsen'**(Mr. 15:42-47; Lc. 23:50-56; Jn. 19:38-42)*

⁵⁷ Na' gwzooa to bene' gwni'a bene' ciuda Ari-matea le' José na' ba gwzolao chzenague' che Jesúsen'. Na' cate' ba chxoa gwbiž ⁵⁸ Josén' gwyeje' lao Pilaton' jaynabe' cuerp che Jesúsen'. Na' Pilaton' bene' mandadw bosityežjue'ne' cuerp chen'. ⁵⁹ Nach Josén' bego'o lo ne'e cuerp che Jesúsen' na' blaže'ne' to lache' xen da' nyach. ⁶⁰ Na' gwlo'e cuerp chen' to lo' bloj cobe che' da' gwche'ene' le'e yej. Na' blole' to yej xen cho'a blojen' cont bseyjon len. Nach beze'e. ⁶¹ Na' María bene' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsen'

⁶² Na' beteyo, gwde žan' caten' chososini'e par ža che Diosen', besedobe bxoz gwnabia' ca' na' bene' fariseo ca' na' ja'aque' gan' zoa Pilaton'. ⁶³ Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': “Yeyon ža yebana' ladjo bene' guat ca'.” ⁶⁴ Da'n'an' gwsela'sca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e bene' le' bebane' ladjo bene' guat ca'. Le še yesaque' bene' ba bebane' ladjo bene' guat ca', gonchen malech clél ca' len diža' dan' gwdise' gwne' Diosen' gwsele' le'.

⁶⁵ Nach Pilaton' gože' bene' ca':

—Gona' le'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo beñe' guat ca'
(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža che Dios, bał dmigw María beñe' Magdala len María ben' yeto ja'aque' jasene'e gan' bosocuaše' Jesúsen'. ² Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. ³ Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca' nac beye'. ⁴ Na' cate' besele'e beñe' gop ca' le', leca gosexize' besežebe' na' gosebixe' gosatte' šlat. ⁵ Perw na' anglen' gože' no'ol ca':

—Bitw žeble. Neda' nezda' Jesúsen' ben' bosode'e le'e yag cruz nan' cheyiljwle. ⁶ Nono de nga. Ba bebane' ladjo beñe' guat ca', can' gwnacze'. Na' le da, le na' latje nga gan' gosegüe'e cuerp chen'. ⁷ Bedao' le šjaya'ac le šjaydixjue'e beñe' ca' zjanaque' Jesúsen' txen ye'gaclene' ba bebane' ladjo beñe' guat ca'. Na' ye'gaclene' gwyobech Jesúsen' yežine' Galilean' clcl ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acsese' zjasyedixjue'ede' beñe' ca' zjanaque' Jesúsen' txen can' goca'. ⁹ Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. ¹⁰ Jesúsen' gože' legaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

Bene' gop ca' jasyedixjue'ede' bχoz ca' can' ba goca'

¹¹ Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bχoz gwnabia' ca' doxen can' ba goquen'. ¹² Nach besedobe bχoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zcha'o mechw. ¹³ Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebje' cuerp chen' lo' blojen' na' besyeyo'en ga yoble. ¹⁴ Na' še gobernadore'n'yende' diža' quinga, neto' šjašaljilento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

Jesúsen' gože' legaque' yeso'e xtiže'na' yogo' nación (Mr. 16:14-18; Lc. 24:36-49; Jn. 20:19-23)

¹⁶ Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'.

¹⁷ Na' cate' besele'ede' Jesúsen' gosonxene'ne'.

Perw bia'cze to chope' gosacžejlaže' še le'na'.
¹⁸ Nach gwbiga' Jesúsen' gan' nite'na' na' gože'
leaque':

—Ba ben Diosen' lo na' doxen yela' chnabian'
dan' de yaban' na' yežlion'. ¹⁹ Da'nan' le šja'ac le
šjased le šjalo'e bene' ca' že' yogo'lol naci^on cont
yesejnilaže' neda'. Na' le gwzoe' nis cont yosolo'e
le chesejnilaže' Xacho Diosen', na' chesejnilaže'
neda' naca' dogualje Xi'ine', na' lencze Spiritw
che'na'. ²⁰ Na' gwsed gwlo'elne' cont yesone'
yogo'lol dan' ba bena' mandadw gonle. Neda'
zoacza' len le'e yogo' ža, na' ca'cze ne' soa' len le'e
cate'ch te che yežlion'. Da' na'zen' chzoja' na'a.

Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
de7d40fb-3909-53d8-8bea-744cf1ce0e41